



Tusi Faitau: Isaia 51:1-6

".... a'o la'u faaolataga e faavauvau lava lea, ma le amiotonu mai ia te a'u e le gausia lava lea."

AUAU O MANATU: "SAUNI ILE FAAOLATAGA, AE AUA LE MASALO."

O le agaga fiafia e toe fa'atalofa ma ofo-alofa atu ai i le Paia ma le maualuga o le tatou Kapelenisia Samoa i le Pule'aga Fa'a-Akiepikopo i totonu ole Lau-mua i Ueligitone. Mai ona tumutumu mauga seia paia fanuaalalo. Malo le soifua laulelei, faamalo le folau manuia. Sa tatou faatali mau ina ia a'e ni mafua lelei. O lele ua lolo'u ifo le lagi, ma aumai mo i tatou uma ona kalasia ile tino, ole Agaga atoa ma le mafaufau. Tatou ave laia se pati ile Atua ma tatou faapea ifo ma le loto faamaualalo.

"IOE, E LELEI LAVA LE ATUA."

Fai mai le tatou MATUA:

"SAUNI ILE FAAOLATAGA AE AUA LE MASALO."

le mauili ma faigata ile mafaufau ona faamaopopo ma opogi le tino, 'ina fa'auau ai le lumana'i.

'I le alaga la le faamoemoega, e tele lava itu e ao ona tapenapena. E feololo pe afai ae laga'i i'au, le fitafita po'o le a'upega. Ae afai ua oti le faamoemoe ile loto ma le mafaufau atoa ma le agaga, o se itu aupito matuitui la lea ma le o'ona.

E foliga fa'apena le tulaga ua fa'asaga nei i ai le galuega a Isaia le Perofeta. Ua na soso atu malie e fa'amaopopo si ona Aiga ma lona Nu'u, auā peisea'i ua emo le uila laulelei, ole a tafia'ese mālie taimi ma ituaso pogisa. A tau lenei faamoemoe po'o lenei moemitiga, ona ea lea ole pologa, ae maua le nofo filemu.

Ole agaga la lea o lo'o i totonu ole Pese a le Perofeta o Isaia, o lo'o lagiina ai ma lagaina ai faamoemoe ole Nu'u. Peisea'i o lo'o leotele mai lava le itu i ni ufi e tutupu, ma se malamalama fou ole a totogo a'e. Lea o lo'o tulolo ai pea le fanauga a Isaraelu ma le manatu ua liu suavai. A o lea ua iloa ai e le tagata ole Atua, le ta'e ma le gapā, ile amo ole nofo pologa.

Ole tala ole faaolataga o lo'o ufitia ile tala o mea tutupu, ole a faia e le Alii le Atua le lavea'i mo lona lava Nu'u. Pe na na te faaola mai i le lolo po'o le afi, e na te faaola lava. Pe lavea'i mai i le gutu ole leona ta'anoa po ole lima lala'u o se urosa, e na te faaola mai lava. Pe ta'ita'ina'ese mai fo'i i le vaotuitui po'o le manava ole Moana sousou, ma le afi, e a'e lava i malo.

Ole feau taua lea ole faaolataga, e le gata mo Isaraelu tuai na faatafea, ae faapea fo'i le tatou Kapelenisia Samoa ma le au fa'atuatua uma lava, aemaise i latou o lo'o tulolo ile Atua lo latou faamoemoe. Auā ole folamua manino lea ma le atoatoa, ole galuega na Afio mai ai Iesu lona Alo Pele e to'atasi, o lo tatou faaola lava ia. Lea na ui ai o ia ile sataro ma le tuugamau, ma ia aumai ai mo oe ma a'u, ma i tatou uma lava lona manumalo, ua fai lava fo'i lea mo oe ma a'u, aua na le'i mafaia e le maliu ma le oti, ona taofiofi lona a'apa mai ma faaola ia te'i tatou.

Ia Manuia tele le faigamalaga faaleagaga a le tatou Kapelenisia Samoa i totonu o lenei foi Masina Fou.

Manuia ona o Keriso

Vauele & Veronika Tuitolova'a (FK)

AFIOGA KATINALE JOHN DEW

20 Me 2022

Fa'atalofa atu i le Nu'u o le Atua

Atonu ua tatou fa'alogi i upu "o lo tatou i ai nei i taimi uiga'ese ma le lu'itau", o lo'o fa'asino lea i le fa'ama'i o le KOVITI – 19. O nei taimi uiga'ese ma le lu'itau ua avea ma vaega o le olaga a palisi. Sa tatou faia ni fesuia'iga i le tele o vaega o le olaga a palisi, a'afia ai ma a tatou sauniga fa'alelotu. Fa'afetai atu ia te outou e tusa ai ma mea sa outou faia ma o lo'o faia pea lava. I lenei tusi ou te mana'o e talanoa atu ma fa'aילו atu ni suiga ua tatou i ai nei.

O lenei o lo'o tatou i ai i le tulaga o fa'ava'a o molī lanu moli a le KOVITI – 19 mo nai vaiaso, ua ou manatu ai e ave'ese nisi o tapula'a sa tu'u atu mo Misasa ma isi potopotoga i palisi. Sa fa'atalanoa ni suiga ma le komiti a faife'au na tu'uina maia ni fautuaga lelei e fa'avae ia latou malamalama'aga fa'alafu lemū.

O nei suiga e mafai ona amata ona fa'atinoina mai le fa'ai'uga o le vaiaso 28 – 29 Me:

2 E mafai e palisi ona toe amata pesepesega. E tatau ona fai fuafua ona o lo'o va'aia pea lea faiga o se tasi o auala e fa'asalalau tele ai le vairusi, aemaise pe afai e lē o faia fa'aleleia e tagata ni ufiufimata. O lo'o avatu ai ma ni nai fautuaga e uiga i pese. Sa lautogia i tatou mai taimi sa leai ai ni pese i Misasa. Fa'amolemole taumafai e faia pea ni nai taimi e leai ai ni pese i le tatalo, aemaise le mae'a o le komunio, ma fa'amalosi'au i tagata e fa'aogā taimi o le leai o se pisa i tomanatuga tatalo.

isi faiga sa taofia ona o le KOVITI – 19 e pei o sauniga mo le fanau, le polesesio mo le moliga, le fa'asoloina mai o ato mo le aoina o mealofa, le ipu ti i le uma ai o le

Misasa ua mafai nei ona toe fa'auau. Komunio mo le 'au mama'i ua mafai ona fa'atino ae ia fa'aeteete i le aofa'i o aiga ole a asiasia. E tatau ona faia ufiufimata. le faia o ufiufimata i Misasa e fa'amalosia pea i falesa ma nofoaga o potopotoga. fa'amamāina masani i falesa ma nofoaga mo potopotoga ua mafai ona toe amatalia. le va ma isi e lē o toe mana'omiaina ae e tatau i tagata ona fuafua mo isi o lo'o si'osi'omia ai latou.

O nei tu'utu'uga e tumau pea: e tasi le fa'atinoga o le Komunio ma na o le lima; fa'ailogaina o le filemū e leai se fepa'ia'i; leai se vaisā i le ulufale atu i falesa; ma e tatau lava ona faia ufiufimata e ositaulaga ma 'au'auna o lo'o tufatufaina le komunio.

O le numera o latou ua maua i le KOVITI- 19 o nisi o nofoaga ua taunu'u i le laugatasi, ae i nisi o nofoaga ua toe alu i luga le numera, ma e tatau ia i tatou ona mataala e uiga i le fa'aeteetega ina ia puipuia le fa'asalalauina o le vairusi. E mana'omia ona tatou pulea lelei le vevesi i le va o le toe fo'i i le masani o le olaga ma le taumafai e fa'aititia le salalau o le vairusi.

E tatau fo'i ona tatou mafaufau i le au matutua ma latou e a'afia gofie ua lē mafai ona auai i Misasa pe afai latou te fa'alogoina le leai o se saogalemū. O le vaiaso na tuana'i atu nei na fili-fili ai Epikopo e tu'u ai pea le fa'amagaloina i le lē mauaina o le Misasa i aso Sa ona o lo'o tele lava le KOVITI – 19 ia tatou fa'apotopotoga. Fa'amanatu atu i tagata e uiga i lenei tulaga.

Ma Fa'amanuia uma lava

+ Ioane

SAGATO ANTONIO O PADUA

OSITaulaga ma le FOMA'I (1195 – 1231)

O le Tulafono a le olaga a Sagato Antonio o le vala'auina lea e le Evagelia e tu'ua mea uma ma mulimuli atu ia Keriso. E fai so'o lava ona vala'auina o ia e faia se mea i ana fuafuaga. O taimi uma lava e tali atu ai Antonio ma le fa'anaunaga fa'afouina ma le faigataulaga e 'au'auna atu i lona Ali'i ma le atoatoa.

O lana faigamalaga o se 'au'auna a le Atua a o talavou o ia ina ua ia filifili e 'au atu i le ituaiga a Aukusitino, lafoa'i se lumana'i o le 'oa ma le olaga lelei ina ia avea ma 'au'auna a le Atua. Mulimuli ane ina ua fa'asavali atu tino o le au ulua'i maletile a le au Faranisisi i le taulaga le nofoaga sa tofia i ai o ia, sa fa'atumulia o ia i le fa'anaunau ia avea ma se tasi o i latou e latalata ia Iesu lava ia: o latou ua maliliu mo le Tala Lelei a le Atua.

SAGATO ATONIO O PADUA

OSITAULAGA MA LE FOMA'I (1195 – 1231)



Ona ulufale ai lea o Atonio ile ituaiga a Faranisisi ma aga'i atu ai e tala'i i nofoaga tu'ufua. Ae o se fa'ama'i na lē mafai ai e ia ona ausia ana fuafuaga. Na toe fō'i atu i Italia ma na tofia o ia i se nofoaga mautū na fa'aalu ai lona taimi i le tatalo, faitau le Tusi Pa'ia ma faia nai galuega māmā.

Na toe sau le vala'au a le Atua i se fa'au'uga na leai se isi na mana'o e tautala ai. O le usita'i ma le fa'aaloalo a Atonio na talia ai le talosaga ma le mata'u. O tausaga mo le sa'ilia o Iesu i tatalo, le faitauina o le Tusi Pa'ia ma le 'au'auna atu iā te ia i le mativa, nofo taupou ma le usita'i na saunia ai Atonio e tatala atu ana taleni e fa'aoga e le Agaga. O le lauga a Atonio na maofa ai i latou sa manatu i se lauga e le'i tapenaina ma sa leiloaina le mana ale Agaga e avatu ai upu i le tagata.

Na maitauina o se tagata maoa'e tele i tatalo ma le Tusi Pa'ia ma le atamai i mataupu telosia, na avea Atonio ma ulua'i felela e a'oa'oina atu le telosia i isi felela. Na toe vala'auina o ia mai lenā tofiga e tala'i atu i tagata fa'apaupau, e fa'aoga ai lona malamalama loloto i le Tusi Pa'ia ma le telosia e fa'aliliu ma fa'amafanafana ia i latou na ta-

ta'i'eseina.

O LE PESE A LE 'AU'AUNA

O LE MOMOLIGA I LE MALUMALU

I le mae'a ai o le fa'amamāina e pei ona i ai le Tulafono a Mose, na latou aumaia o ia i luga i Ierusalem e avatu o ia i le Ali'i (e pei ona fa'atonuina e le Tulafono a le Ali'i): "o tama tane ulumatua uma e tāua i latou e pa'ia mo le Ali'i") e fa'apea fō'i ona faia le momoliga e pei ona fai mai ai le tulafono: "O le uluga manutagi, po o tama'i lupe e lua fua" (Luka 2: 22 – 24).

O le molimoliga o Iesu i le malumalu, e pei o le peritomeina, o se gaiōiga o le usita'i i le Tulafono a le feagaiga tuai, ma o le taimi lava fō'i lea, o se gaiōiga fa'aperofeta e fa'a'ailoa ai le sau o le feagaiga fou, o lē ua fa'apa'iaina, Keriso, le ositaulaga sili ma le perofeta.

O le Atua lava ia na ala ia Mose, na fa'amatalaina le uiga loloto o lenei fa'atinoina o le momoliga: "Ona fetalai lea o le Ali'i ia Mose, o lo'o fa'apea mai, "Ia fa'asaina mo a'u o ulumatua uma lava, e ta'itasi uma lava e mua'i fanau mai i le fanauga a Isaraelu, o tagata atoa ma manu, e fai lava ia mo a'u. A uma ona fa'ao'otia oe e le Ali'i i le nu'u o sa Kananā, sa ia tautō ai i ou tamā, e avatua iā te oe, ona e tu'uina atu lea i le Ali'i o i latou uma o e mua'i fanau mai. A fesili mai lou atali'i ia te oe i se aso, e fa'apea mai, "Se a ea lenei? Ona e tali atu lea iā te ia, "O le 'a'ao malosi na ta'ita'iina mai ai i matou e le

Ali'i mai Aikupito, o le mea sa nofo pologa ai" (Esoto 13: 1 – 14).

Ina ua usita'ia e Maria le Tulafono, fa'ataunu'uina lenei sauniga, vivi'i i le Atua mo le fa'aolagataga mai le saisaitia o le pologa, ua ia iloa o Iesu o le Atua le Tamā e āna i se auala uiga 'ese. O lenei sauniga ua na o se fa'aaliga o le loloto o le moni o Iesu, mai lava le amataga, na fa'apa'iaina atoatoa i le malō o le Tamā ma le talalelei. Ae na amata ona manino lelei mai ia Maria o le auala e ao ona mulimulita'i e Iesu o le a mana'omia ai lona vavae'ese mai ma se faigataulaga tele. I le taimi talafeagai ai, o le a ia fa'alafi o ia lava e pei o le a faia e Ioane le Papatiso, ina ia faia e Iesu i lona uiga 'ese fa'aali atu i tagata uma o se perofeta, le ositaulaga, ma le faigataulaga.

O le molimoliga o le ulumatua o se gaiōiga o le fa'apa'iaina. A o fa'ataunu'uina e Maria lenei gaiōiga, momoli atu le tasi ua fa'apa'iaina e le Agaga Pa'ia, ua ia fa'apa'iaina o ia lava o lana pa'aga ma le 'au'auna. Ua ia iloa o le sauniga faitaulaga i uluga manutagi e lē mafai ona suia ai le avatua o ia lava. E uiga 'ese lenei i le va'aiga o Keriso ua sau e ofo mai o ia lava.

I le papatisoga o Iesu i le Oritana, o lupe na avea ma fa'aailoga o le fa'apa'iaina e ala i le Agaga

O LE PESE A LE 'AU'AUNA

O LE MOMOLIGA I LE MALUMALU

Pa'ia. O Maria, ma le fa'atauva'a o se lupe, e masani ona fa'atuatua ma amio pulea i musumusuga a le Agaga Pa'ia, ma o lea ua fa'ataunu'uina ai lana matafaioi i galuega a le fa'aolataga. E i ai mealofa a le Agaga Pa'ia, ua ia, i tulaga uma lava, o se malamalama i mea ua mana'o i ai le Ali'i mai ia, o ia ua ofoina atu lana ulumatua i le malumalu.

Matou te fa'afetai atu ia te oe, le Ali'i e,

le Atua o le talafa'asolopito,
matou te fa'afetai atu ia te oe, ona e ala ia Mose,
lau 'au'auna,
ua e fa'aalia mai ai ia i matou le uiga loloto
o le molimoliga, na sau i lona atoaga moni ia Iesu Keriso,
le Tasi na fa'atalitali i ai perofeta.
A o molimoli atu e Maria Iesu, ua ia momoli atu ai ma ia,
fa'atasi ai ma le fa'anaunauga sili o le vivi'i i

lou suafa i mea uma lava.

Foa'i mai e ala i lona fa'alavelave,
a matou momoli atu Iesu i le faigataulaga
o le Eukalisitia ia matou fo'i ona ofoina atu i matou lava
atoatoa e auauna atu fa'atasi ma Iesu ma Maria.

Maria e, momoli atu i matou nei fa'atasi ma Iesu
i le Tamā i le lagi,
tatalo mo i matou nei ina ia matou iloaina
o le olioli tele o le iloaina o matou
o le Atua e āna o ni ana meatotino, fa'apa'iaina
ia te ia
fa'atasi ma lau ulumatua, Iesu Keriso. Amene

GALUEGA A LE AU APOSETOLO

4

O le Ekalesia i Anitioka

19Na o atu fo'i ē na fa'ata'ape'apeina i le sauāga na tupu 'ina 'ua oti Setefano, 'ua o'o lava i Foinie, ma Kuperu, ma Anetioka, 'ua lē tautala atu i le 'upu i se isi, 'ae na o tagata Iutaia lava.
20 O tagata Kuperu ma Kurene fo'i nisi o i latou, 'ua o atu i Anetioka; 'ua tautala atu i tagata Iutaia e tautala i le gagana Eleni, ma tāla'i atu le Tala Lelei i le Ali'i o Iesu. 21Sa 'iā te i latou fo'i le 'a'ao o le Ali'i; 'ua fa'atuatua fo'i tagata e to'atele, ma 'ua liliu mai i le Ali'i.

22'Ua fa'alogole ekalesia i Ierusalemā i lea tala; 'ona 'auina atu lea e i latou Panapa, ia alu atu o ia 'ia o'o lava i Anetioka. 23'Ua taunu'u o ia ma 'ua na va'aia le alofa tunoa o le Atua, 'ona 'oli'oli lea o ia, ma apoapoa'i atu 'iā te i latou uma 'ia tumau o latou loto, ma pipi'i atu i le Ali'i. 24Auā o le tagata amiolelele o ia, 'ua tumu i le Agaga Pa'ia ma le fa'atuatua; 'ua fa'aopoopoina ai fo'i tagata e to'atele lava i le Ali'i.

25'Ona alu lea o Panapa i Taso e sā'ili mai Saulo. 26'Ua maua o ia, 'ona 'aumaia lea e ia i Anetioka. 'Ua fa'atasi fo'i i lā'ua ma le ekalesia, 'ua 'atoa le tausaga, ma 'ua a'oa'o atu i tagata e to'atele; o Anetioka fo'i na ulua'i ta'ua ai lava so'o, o Kerisiano.

27O aso ia na o ifo ai perofeta mai Ierusalemā i Anetioka. 28Na tula'i fo'i le isi o i latou, o Akapo le igoa, 'ua fa'aali e le Agaga 'iā te ia o le a o'o le oge tele i le lalolagi uma; na taunu'u lava lea mea i le nofoa'iga a Kaisara Kalaotio. 29'Ona filifili ta'ito'atasi lea o so'o e fa'ataua i le mea e mafai e le tagata, 'ina 'ia 'auina atu se meaalofo i le au uso o lo'o nonofo i Iutaia; 30na faia lava lea mea e i latou, ma 'auina atu e o ma Panapa ma Saulo e 'ave i toeaina.

11: 19 – 30 O le Talaiga i Anitioka

E ui na fa'ailoa mai e Luka le feiloa'iga a Peteru ma Konelio o se fa'atusa ma se pule fa'alavelave, o lenei faitauga ua fa'amanino maia o le upu ua o'o atu i le tagata o nu'u 'ese e ala atu i isi tagata. I le amataga mai o fa'asauaga na mulimuli mai ai le maliu maletile o Setefano, o Kerisiano Ierusalemā na aumaia le upu i tagata Iutaia e tautatala i le gagana Eleni mai Kuperu ma Kurene ma i latou nei na fa'aevageliaina le au Eleni (tagata o nu'u 'ese) i luga i Anitioka o Suria.

E pei o le tulaga ia Peteru ma Konelio, o lenei 'a'apa atu i le tagata o nu'u 'ese i Anitioka na fa'amausaliina e le pulega a Ierusalemā: Ona

GALUEGA A LE AU APOSETOLO

latou auina atu lea o Panapa, o lē na tapā le fesoasoani a Saulo o Taso. Afai o Luka na “fa’amalosi’au ia Panapa” o tagata sa tutumau lo latou fa’atuatua (v.23), atonu o lo’o tau fa’ailoa mai le uiga o le igoa tauvala’au a Panapa (Panapa = “atali’i o le fa’amafanafanaga”), na ia fai mai sa fa’aogaina e le au aposetolo i lenei sa Levī mai Kuperu.

I le tusi a Paulo i Kalatia sa ia fa’asino iā ia lava “*ua tu’uina mai ia te au le tala lelei mo ē lē peritomeina, pei ona tu’uina ia Peteru mo ē peritomeina*” (Kalatia 2: 7). Afai o lenei e lē talafeagai ma le fa’amatalaga a Luka o le fa’aevageliaina o le au aiga a Konelio, e tataua ona maitauina e le’i fai mai lava Paulo i isi tusitusiga o ia o le *ulua’i* misiona i tagata o nu’u ‘ese. Ma o Luka ua aumaia ia i tatou se vaega tāua e uiga i le fa’aevageliaina e Peteru o e ua peritomeina (Galuega 2 – 5; 9: 32 – 43). Tatou te le’i fa’alogo

fo’i sa fa’aalu se taimi umi fa’atasi ma le au peritomeina.

I le fa’amatalaina o le atina’e o le filofilo (Iutaia – Tagata Nu’u ‘ese) o le ekalesia i Anitioka, ua tuputupu a’e o se fa’alapopotoga manino lelei ua mana’omia se igoa fa’apitoa, *hoi Christianoi* (“Kerisiano” le ulua’i taimi na fa’aoga ai lea igoa), ua fa’aali mai e Luka lo latou tutū fa’atasi ma uso ma tuafafine Iutaia – Kerisiano. O le tali atu i perofetaga a Akapo e uiga i le oge ua mautinoa lelei o le a salalau tele, na avatu e le au Anitioka se fesoasoani i le au matutua i Ierusalem...*fa’aauau pea...*

O LE MATAFAIOI A FAFINE I FUAFUAGA A LE ATUA MO LE FA’AOLATAGA

I le Evagelia a Mataio o se tasi o va’aiga matagofie ole a’afiaga o fafine e to’afa i lana tusitusiga: Tamara, Ra’ava, Ruta ma Patesipa, le avā a Uria. O le fesili ua tula’i mai e sautualua: aiseā na a’afia ai e Mataio nei fafine ma afai e i ai, so latou feso’ota’iga ma Maria, le fafine mulimuli ua ta’ua i le gafa? E fa’apea fo’i pe na va’aia e Mataio o nei fafine e to’afa e tutusa la latou matafaioi ma ali’i ua ia ta’ua? Ona tula’i mai ai lea o le isi fesili, pe sa i ai se mea na o gatasi ai nei fafine? O lona uiga sa i ai se feso’ota’iga i le va o latou ma lona luafa’atasi ma Maria, afai e i ai o le a lea?

O le manatu e amata ai e i ai se avanoa o nei fafine ua va’aia o ni tagata *agasala*. E lē o se mea fou ona o se mataupu fo’i na faia e Ierome lava ia. O i’inei, atonu o lo’o aumai e Mataio se manatu, e iā Iesu ma ala iā Iesu o le tagata ua pa’ū ma agasala ua lavea’ina e ala ia Iesu ma ia Iesu. Ma e o’o lava ile amataga o lana evagelia ua saunia e Mataio le au faitau mo le tala’iga lavea’i a le Alo a le Atua ia Iesu Keriso ma ala ia Iesu Keriso. Ae ui i lea, e o’o lava i se faitau fa’atopetope o tusuituisiga pa’ia Eperu o le a iloaina ai fa’afitauli i lenei laina o finauga. ‘Mo se fa’ata’ita’iga se’i o tatou va’ai ia Ruta ma fesiligia pe na agasala fa’atasi ma Poasa? O se faitauga fa’aleleia o Ruta 3: 6 – 9, 14 e lē o ta’ita’ia sa’o i se fa’ai’uga o se

fa’atosiga ma le faita’aga ua fa’amatalaina e o’o lava i ni fa’amatalaga e lē manino pe lē tu’u sa’o mai fo’i. E tāua fo’i le manatuaina le inoino o Isaraelu i tagata Moapi, sa talitonuina o a latou mafua’aga o ni faiga fa’amataifale (Kenese 19: 30 – 37). O lenei la, ua maua mai se vaega i le fesiligaina o Ruta ia tatou tusitusiga o se tagata Moapi lava ia ua va’aia o se tagata agasala. O le taimi la lenei, i le mae’a ole maliu o lona to’alua, na filifili Ruta e nofo ai pea ma le tinā a lona to’alua i upu nei: “*O le mea e te alu i ai, ou te alu ai fo’i; o le mea e te nofo ai, ou te nofo ai, e fai lou nu’u mo’u nu’u; e fai lou Atua mo’u Atua*” (Ruta 1: 16). Maitau fo’i upu a Poasa, “*auā ua iloa e le ‘a’ai uma o lo’u nu’u, o le fafine amio lelei lava oe*” (Ruta 3: 11). E anoanoa’i mea ua aumai mo tatou e tomanatu ai e uiga i le agasala a Ruta. A tatou va’ai i isi fafine ua aumai e Mataio e lē manino lelei mai. O Tamara o sē e fa’atosiga ma na taumafai e foliga o ia o se fafine talatane. Ae ui i lea, ile taimi o Iesu, o mea ua ia ausia ona o sē na liliu i le talitonuga Iutaia o se tagata Kanaanua ua toetoe lava ona mauaina le tulaga o se tagata maoa’e. Ona o Tamara na va’aia o se tasi ua aveva ma fa’atusa o le fa’atuatuga fa’amesia, i ana gaioiga, sa ia fa’aauuina le laina a le aiga o Iuta e ala i lana tane ua maliu. I lenei auala na

O LE MATAFAIOI A FAFINE I FUAFUAGA A LE ATUA MO LE FA'AOLATAGA

va'aia Tamara o se fafine sa fa'atuatua i folafolaga fa'amesia a le Atua na faia e ala mai i suli o le ituaiga o Iuta. O se fa'atuatua fa'ape nei na avatua le fa'aaliga i le talitonuga o le Atua o le a fa'aauau ona fa'atasi ma ona tagata ma na mana'o Tamara e fa'asoa atu lenei fa'amanuiaga. E lē o ni gaiouga lenei a se tagata agasala!

A tatou liliu atu ia Ra'ava e fa'apea fo'i se va'aiga na i ai. Muamua, sa fa'amatalaina o ia o se liulotu, na liliu i le fa'atuatua Eperu. Ae na foliga mai fo'i na ia ausia se tulaga ta'uta'ua ina ua o'omai le Feagaiga Fou ona o le fesoasoani sa ia avatua ia Isaraelu i lana manumalō i Ieriko. O le mea lea, e o'o mai i le taimi o Eperu 11:31 ma le 1 Keleme 12: 1 ua va'aia Ra'ava o se fa'ata'ita'iga lelei o le fa'atuatua Kerisiano. Mulimuli lava, e fa'apefea Patesipa ma lana gaiouga o le talatane ma le Tupu o Tavita? Ua foliga mai o le manatu lautele i le taimi o le Feagaiga Fou, ua foliga mai o se manatu manumalo atonu ua lē maitauina le tulaga o le lelei tele na tupu sa ia fanau mai le Tupu o Solomona ma le faia o lea ua fa'aauau ai le laina a Tavita. O se taunu'uga, ina ia fa'aauau pea le finauga, o nei fafine e to'afa na va'aia o ni tagata agasala, ae o'o mai i le taimi o le Feagaiga Fou, o se finauga ua vaivai.

E lē taumate o le isi avanoa na a'afia ai e Mataio nei fafine e to'afa i lana gafa ona o latou o ni tagata mai nu'u 'ese. Ua i ai le manatu o le faia e Mataio i lenei auala ua toe faia e pei mai le amataga o lana evagelia o lo'o taumafai Mataio e aumai le manatu o le Mesia Iutaia e tau sa'o lona gafa i tagata mai Nu'u'ese, e lē o ni Iutaia ma o lea na sau mo tagata uma lava – le lalolagi atoa lava. O le manatu o latou o ni tagata mai nu'u'ese na 'au i ai Lukelu. Ua uma ona fa'ailoa o Ruta o se Moapi, ae o Ra'ava ma Tamara o tagata mai Kanana. Ona mulimuli mai ai lea o Patesipa e masani ona ta'ua o le avā a Uria le sā Heti. Na a'afia e Mataio nei fafine e to'afa ona o latou o ni tagata mai nu'u'ese? O lea ua tatou toe aumaia le manatu o Ra'ava ma Ruta na liliu i le talitonuga Iutaia. Afai o lo'o taumafai Mataio e aumai le manatu o tagata mai Nu'u'ese o se vaega o fuafuaga a le Atua mo le fa'aolataga o tagata uma, ma o le a la le tulaga o tagata liliu mai i le fa'atuatua Iutaia? E fa'apefea ona malamlama tagata o nu'u'ese i nei fafine ua liliu i le talitonuga Iutaia? Mulimuli lava afai o fu-

afuaga nei a Mataio, sa lē mafai ona ia fa'aogaina ni fa'ata'ita'iga ua sili atu mai le lalolagi o tagata o Nu'u'ese? Aua fo'i ne'i galo o nei fafine e le'i liliu ia Iesu po'o le Fa'akerisiano ae o le fa'a-Iutaia. E tāua fo'i le manatuaina o le to'atele o tagata Kerisiano a le Ekalesia Kerisiano mai anamua na amatatia e Kerisiano Iutaia. O latou na liliu mai le lalolagi o Tagata o Nu'u'ese sa lē mana'omia ona avea muamua ma tagata ua liliu ma avea ma Iutaia. Atonu o le isi auala e fa'amanino lelei ai lenei manatu o le fa'apea atu sa tataua ona liliu ma avea ma Kerisiano Iutaia ae sa leai se molimau tele po'o ni fa'amaumau. Ae ui i lea, o le manatu mulimuli i lenei finauga o Maria. Afai tatou te sa'ili mo se so'otaga i le va o ia ma nei fafine e to'afa ua aumai e Mataio i lana gafa, ona i ai lea o se fa'afitauli ona o le a lava le auala e va'ai i ai o Maria e lē o se tagata mai nu'u'ese.

Ona tatou o'o mai ai lea, atonu o se manatu fa'ai'u e mafai ona fuafuaina e lua ni elemene o i ai, e a'afia ai Maria i nei mea e lua. Muamua, e mafai ona tatou fa'apea e tasi le mea ua o tutusa ai nei fafine e to'alima o ni fa'atasiga 'taufa'aleagaina' ma a latou pa'aga. O lona uiga o se fa'atasiga i se tulaga ua atagia e 'sesē' i le laloagi i fafo atu ae e ui i lea, ua fa'aauuina le laina fa'amanuiaina a le tasi na fa'apa'iaina e le Atua, le Mesia. Lona lua, i le va'aiga ia i latou ta'ito'atasi, ua fa'aalia mai ai o le fafine ua a'afia ua fa'aalia se ituaiga o gaiouga pe na a'afia i se faiga tāua i le tu'uina atu o i latou lava i le fīngalo o le Atua o se vaega o ana fuafuaga mo le fa'aolataga. Mo le fa'ata'ita'iga, o Tamara na u'una'ia le gaiouga o lona taunu'uga o lana faita'aga ma Iuta. E fa'apea fo'i Ra'ava, o se talatane, na ulu atu i se tu'ufa'atasiga ma Soloma ma o lona i'uga o le ulufale atu lea o Isaraelu i le nu'u na folafolaina. Toe fo'i ia Ruta, o lona una'ia o Poasa, o lo'o taufa'amatala mai ai se faiga taufa'aleaga, o lo'o fa'apea mai se finauga ana lē tupu e lē ola le gafa a Tavita. Ona totoe ai lea Patasipa o lona faiga fa'atalatane na mafua ai le fanau mai o Soloma ma le fa'aauuina o le gafa a Tavita. E lē masalomia na va'aia e Mataio i olaga o nei fafine le galuega a le Agaga Pa'ia. I se fa'aupuga ase tasi o faife'au a le ituaiga o Iesu, 'O le Atua o le ofoofogia' o lo'o galue. Ona o le Atua ua fa'aogaina latou e le'i manatu i ai, latou e le'i fuafuaina

O LE MATAFAIOI A FAFINE I FUAFUAGA A LE ATUA MO LE FA'AOLATAGA

fo'i, e masani e itagia e lenei lalolagi, e masani ona fa'alavelave i taimi ma avanoa ina ia ausia lana fa'aolataga mo ona tagata uma. Ona e leai se isi e i tua atu o le alofa o le Atua, e leai se isi i tua atu o lona agalelei, o lona alofa ma lana fa'amagaloga. Ua liliu Mataio i fafine e fa'ailoa mai ai gaioiga a lenei Atua ma le mea tatou te maua i ai o ia. I olaga o fafine, i vaitau sa latou ola mai ai, sa va'aia ua ola ai ua leai se mea e itititi ifo i lo le olaga tautafa'aleaga ae na ala ia i latou ma le kalasia a le Agaga Pa'ia na fa'alavelave le Atua e aumaia le fanau mai o le Mesia.

Tatou liliu atu nei ia Maria, le avā a Iosefo o lē o le a fanau maia Iesu ua ta'ua o Keriso (Mataio 1: 16). O i'inei la, a tatou va'ava'ai fa'alelei i ai, o le a amata ona manino lelei mai mea uma lava. E pei lava o fafine e to'afa na tatou ta'ua, o Maria na si'osi'omia i fa'aletonu ina ua iloina ua tō o ia e ui e le'i i ai se fa'atasiga ma lona to'alua o Iosefo (Mataio 1: 18). O i'inei la, e pei ona fai mai Mataio na fa'alavelave le Atua, aga'i sa'o lava ile tala fa'asolopito, e ala i le kalasia a le Agaga Pa'ia e aumaia le fanau mai o lona Alo ma i le faia ai o lea, fa'ataunu'uina lana folafolaga fa'amesia. O le 'ese'esega tele i'inei, e lē pei o fafine na ta'ua muamua, e leai se tamā fa'alalolagi nei.

E fa'aapefa la ona tatou toe va'ai ma fa'ai'u la tatou su'esu'ega i matafaioi a fafine i le gafa a Mataio? O le fa'aogaina e Mataio o faiga ta'uvala i olaga o fafine e to'afa ua sauniuni ai le ala

mo le fanau mai o Iesu i le va'aiga i le olaga o Maria, o se fafine na iloa ifo ua ma'itō ae lei fa'aipoipo. E lē tatau ona fa'aitiitia ia i tatou le tāua o lenei mea i fuafuaga a le Atua mo le fa'aolataga o le lalolagi. E masani o matafaioi a fafine, i le olaga a le Ekalesia, e lē gata e fa'atāuaina ae e lē malamalamaina fo'i. Mai ia Mataio ua tatou mauaina ai se isi va'aiga 'ese, ua fa'amalosi'auina i tatou ina ia taumafai e 'aia le va'ai na o pito i luga i mea ua va'aia ae fa'apea i lalo ifo i vaega e le va'aia, ina ia lu'itauina e le fe'au a le evagelai, e sa'ili mo le Atua i taimi e le'i mautulaga e manatu i ai, ia tatala atu ina ia maitauina o ia i i'ina ma ona iloina lea o ia, alofa ia te ia ma 'au'auna atu ia te ia.

Ae ui i lea, atonu e i ai le isi lesona tāua e ao ona a'oa'oina mai tomanatuga i le gafa a Mataio ma o lenei: o le evagelia ua i ai mo tagata uma lava. Atonu o se manatu o nei fafine e to'afa i luma atu o Maria o ni tagata mai nu'u 'ese o lo'o i ai se fe'au tāua mo tatou. O le telosia a Mataio o se tasi o le a'afiaga o tagata uma: Tamara, Ra'ava, Ruta ma Patesipa o ni ulua'i tagata mai nu'u 'ese ua fa'aogā e fa'ailoa mai ai pe na fa'aapefa i le Mesia a le Atua ona aumai uma ona tagata, e aunoa ma se tu'usaunoaina i ana fuafuaga o le fa'aolataga. I lenei auala o tatou o atali'i ma afafine a Apera'amo ma o le Tala Lelei lenei a le Atua.

O LE SAUNIGA E LĒ O SE ASIASIGA I SE FALE MATA'AGA

E masani ona fenunia'i ia i tatou le pa'iaga ma le mamalu, le to'atele ma le matagofie, ma le fa'atuatuaga Kerisiano ma amioatua.

So'o se isi lava e 'au ai i se sauniga Katoliko mo le ulua'i taimi o le a fa'ate'ia i le anoanoa'i o tāga ma gaioiga, fa'atusa, ma ituaiga o la'ei e le'i va'aia e lenā tagata muamua i se isi nofoaga. O nisi o ta'ita'i o le a va'aia le fepulafi mai o la'ei i silika ma 'auro – e pei e sau mai ni āta tusi mai le 1421 – 1497. I nisi o nofoaga o le a fa'alogoaina nai vaega i le gagana Latina mai le seneturi 19 ma nai fa'aleoga o upu mai le seneturi 8 – na

fausia ona o ē mai matū ua lē toe malamalama i tagata mai saute o atumauga i Europa. Inā fo'i taimi ua lē toe aogā o se auala o feso'ota'iga i aso uma i na vaitau!

Atonu e fa'alogoaina ni tatalo ua peseina i se faiga ua ta'ua o le Fa'akelekolio: o se aufaipese i aso nei ua taumafai e toe usuina o se faiga mai le seneturi 20 o mea sa fa'aleo mai e monasari mai tausaga ogatotonu i Farani.

Ona i ai lea ma tāga – ifo o le ulu e o'o lava i le fa'aogaina ole tulivae – sa sau mai se lalolagi ua fa'atulagaina i tulaga fa'asosaiete a le maota te-

O LE SAUNIGA E LĒ O SE ASIASIGA I SE FALE MATA'AGA

tele inā vaitau, ae o lenei ua fa'aogaina e tagata ua folafola mai ua latou fa'amaopo maia faiga tutusa fa'aletagata ma le sa'olotoga.

Taimi ua Tuana'i e Lelei Atoatoa

Atonu o le tele o a tatou sauniga pe va'aia e fa'atosiga, e lē ona e tautala mai ia i tatou e uiga i le Atua ae ona e fa'amalieina ai o tatou lagona o le alualu lelei ma le matagofie. Ae ua tatou potopoto mai fa'asauniga ina ia fa'aperofetaina ma fa'aleleia o tatou fa'aso'oina, ae lē o le mauaina o se poto masani matagofie. E lua ni lamatiaga o lo'o upeupea i autafa o faigatalosaga Katoliko – ma fa'apea ai ma ekalesia uma na mauaina mai se sauniga mai taimi ua tuana'i: Muamua, ua fenumia'i ia i tatou le pa'iaga ma le mamalu. O le pa'iaga ua tatou iloaina ai se mea i tua atu, le misitelio ua sili atu i lo le olaga. Mamalu ua na o se mea ua fa'ailoa mai ai iā i tatou le “maoa'e” ma le “malosi”.

Lona lua e fenumia'i ia i tatou le fa'aleagaga ma le matagofie.

Ole fa'aleagaga o le iloaina o le olaga e lē fa'amatalaina e ia o ia lava ma ua tosina i tatou i tua atu e le isi. O le manatu o Mose o lo'o i luga o le “ele'ele e sā” (Esoto 3: 5). O le matagofie o lo'o maua i le tatou atulaulau ma o se fiafiaga i mea ua fa'amalieina ai i tatou ma o tatou lagona ta'ito'atasi i le “matagofie”.

I se lalolagi ua masani ai atonu e leai se 'ese'esega i le va o le “mea ua sa” ma le mamalu, le Paia ma le matagofie. Ae ona o tagata ola e 'ese'ese, e ao ona tatou fa'aeteete o se lagona fa'aletagata i le mamalu ma tulaga fa'apea e lē tineia ai i lalo le leo taumusumusu a le Agaga.

O Taimi ua Tuana'i ua Tuana'i

Ae o nisi o le a alalaga: e tataua lava ona tatou au-maia taimi ua tuana'i! O suiga e lē faigofie! O se tali masani lenei a le tagata i mea fa'alelotu ma tatou te tu'u fa'atasia le fa'atuatua ma le manatu

mafana o le amio atua mo taimi ua tuana'i. Ua tatou fa'aopopo i lenei fenumia'iga pe fa'apea mai se tasi o se tatalo i le Latina 'E mai taimi o Sagato Siasia le Matagofie' i le 500s. Ona latou finau mai lea i le fa'aliliuina ina ia maua pea le uiga o le ulua'i Latina, i lo se faiga ina ia faigofie ai ona malamlamaina. Ma o le tele o nei fa'anaunauga mo mea ua tuana'i ua na ona ta'u maia o nei faiga ua tuai ma leva, ae le pa'ia. O le leo o le Atua ua tautala ia i tatou i aso nei i le tatou lalolagi, e pei o lana foafoaga alofa o lo'o tatou ola ai nei. O la tatou Atua o le Atua o le ola ma le fa'amoemoe mo a taeao.

O se Vaega o le “Fa'avalevlea”

Ae mana'omia ni fale mata'aga ma e mafai ona aua nei o tatou fa'anoanoa?

Ioe, faia ia tele ni fale mata'aga ma asiasi i ai. E mafai fo'i ona e filifili e nofo fa'alatalata i ai ma fa'aalu ou taimi e asiasi i ai i aso uma! Ae (1) 'aua ne'i fenumia'i se fale mata'aga ma faigataulaga. Ma ia manatua (2) e to'atele tagata e lē fiafia i fale mata'aga – pe manatu i ai o ni nofoaga e va'aia ai ni mea fa'avalevlea mai aso anamua. Ia fa'apea fo'i – ia fa'aeteete! E to'atele fo'i ositaulaga e fiafia e asiasi i fale mata'aga ae o nei fale ua na o se tofotofoga a latou e to'aitiiti. Fesili i e matutua o lo'o mafaufauina ni “aso tafafao” ma fanau o le a fa'amatalaina mai o se manatu i se fale mata'aga e fai lava si faigatā.

Sa i ai se tinā na talanoa i se tasi o ana fanau teine e uiga i ona mafua'aga e lē “alu ai i Misasa”. Fai mai o ia “o lavalava e ofuina e faife'au e fa'avalevlea”.

Afai o tatou manatu i so'o se mea i le sauniga e “fa'avalevlea” e le o se fa'avae lelei lenā mo faigataulaga i le Atua.

PE A MALIU SE TASI E PELE

O 'e fa'anoanoa i se maliu o sē e pele iā 'oe? Po o e fa'alogoina pea lava le mafatia? Atonu sa e fesiligia lava e 'oe lenei fesili: Afai e lelei le Atua ma tele lona mana, aiseā ua ou puapuatia tele

ai. O le tala lelei la e mafai ona tatou feagai atu i le maliu – e o'o lava i o tatou oti – ma le lototoa, lototele, ma le fa'amoemoe.

PE A MALIU SE TASI E PELE

A maliu se tasi ua pele ia i tatou, tatou te fa'anoanoa. Ma e to'atele nisi e tauivi ma nei taimi pagatia ma pe fa'apefea ona ui atu i nei taimi faigatā. Aemaise nei taimi o le fa'ama'i ua to'atele ua fa'anoanoa ai – pe a fa'amata'u e le oti latou e matutua ma talavou, le 'au malolosi ma le au vaivai – e fa'apefea ona tatou tauavea nei mafatiaga?

E tele ni tali mo lena fesili – ae e to'atele fo'i ua iloaina tatou te va'ai i le Tusi Pa'ia o le moni, le Upu a le Atua. E lē na o se tusi o le tala'aga ma perofetaga; o lo'o i ai tali i fesili tetele o le olaga. A tatou saili mo ni ta'iala e uiga i le maliu ma le oti ma fa'anoanoaga e si'osi'omia ai le ave'eseina atu o sē e pele, e ao ona tatou tu'u le Upu a le Atua i le ogatotonu o la tatou va'ai. O le mea lea o la tatou manatu fa'avae muamua lenā ina ia mafai ai ona tatou taliaina se maliu a se tasi e pele iā i tatou:

#1. Va'ai i le Tusi Pa'ia mo se fa'amafanafanaga, fa'amoemoega, ma ni tali.

O se ali'i e igoa ia Iopu na ola mai i le afe o tausaga. Sa tauivi i le tele o fitā ma puapuagatia. Sa maliliu nisi sa alofa tele i ai – o ana fanau, atali'i ma afafafine – mata'utia i se tasi o aso. Sa tauivi ina ia malamalama ma na o'o lava ina tu'ua'ia le Atua mo ia fa'alavelave. Ae i le fa'ai'uga, sa tu'u atu atoa lana fa'atuatuga i le Atua ma tomanatu i le fa'amoemoega i le toetu: *“Afai e oti le tagata, e toe ola mai 'ea o ia? Ou te fa'atalitali atu i aso uma o le taua ua tofia ai a'u, se'ia o'o ina suia o a'u. Ia e vala'au mai, ona ou tali atu ai lea iā te oe; ia e finagalo alofa i le galuega a ou 'a'ao”* (Iopu 14: 14 – 15).

Na talitonu Iopu i le “suiga” o le a sau – le toetu mai le oti. Sa ia talitonu o le a sau le taimi o le oti e toetu mai i le tali atu i le vala'au a le Atua. Ioe, e mafai ona faitau mai le amataga o le Tusi aga'i atu i le fa'ai'uga, ma o le a e maua ai le fa'amausaliina o le ola i le mulimuli mai i le oti. O la tatou olaga ua i ai nei e lē o le i'uga lea.

A o i ai Iesu i lenei lalolagi, o ia o le Atua i la le tino. O le a le mea sa ia fai mai ai e uiga i le ola ma le oti? Maitau: *'Aua tou te ofo i lenei mea, auā e o'o mai le aso e fa'alogoa ai i lona leo o i latou uma ua i tu'ugamau, ma latou o mai ai; o e na amio lelei, e toe tutū i le ola; a o e na amio leaga, e toe tutū i le fa'asala.* (Ioane 5: 28 – 29).

Na fai mai Iesu e i ai le lumana'i i tua atu o le oti.

O Upu na a le Alo o le Atua lava ia. O ia lava na toetu mai le maliu. Na tusia e le Aposetolo o Paulo e uiga i le soifuaga o Keriso i le mae'a o lona maliu: *Afai fo'i ua tala'ina Keriso ua ia toe tu mai nai e ua oti, pe fa'apefea ona fai mai o isi o outou e leai se toe tu mai nai e ua oti?”* (1 Korinito 15: 12)

E ui i le toetu mai o Keriso, e to'atele e lē talitonu. I auga tupulaga uma, e i ai lava latou sa masalosalo. Ae na fa'amatala e Paulo o le toetu mai o Keriso sa molimauina e le faitau selau o tagata. E toa'etele sa soifua mai i le taimi na tusia ai e Paulo e fa'apea: *Auā na ou tu'uina atu iā te outou mea muamua, o mea fo'i ia na ou maua fo'i e a'u; na maliu Keriso mo a tatou agasala, pei ona tusia; na tanu fo'i o ia, ma toe tu mai i le aso tolu, pei o upu ua i Tusi. Na iloa fo'i o ia e Kefa, ona iloa lea e le to'asefulu ma le to'alua. Ona toe iloa lea o ia e le au uso e lima selau ma ona tupu ina ua fa'atasi; o le to'atele fo'i o i latou o ola mai, ua o'o i ona po nei, a o isi ua momoe”* (1 Korinito 15: 3 – 6).

Fuafua i upu a Paulo. O la e fai mai i le taimi na ia tusia ai, e faitau selau i latou na soifua mai na va'ai i le Keriso toetu ma o lo'o i ai lava i lena taimi ma o lo'o talanoa ai lava. Afai e le mautinoa pe talitonu i le Tusi Pa'ia, pe mafai ona faia e Paulo se fa'amatalaga fa'apea? Afai e le'i toetu mai Iesu Keriso aiseā o le a tu'uina atu ai e Paulo lona ia lava tagata e ta'u leagaina ai i lea tala? Ma aiseā ia Paulo – fa'apea isi Aposetolo i se taimi mulimuli faia ni osigataulaga i lona olaga i lo le faia o ni tala'iga e tete'e atu i ai?

Sa mafai ia Paulo ona fai mai ma le mautinoa, *“Auā o lo'u ola ua iā Keriso lea; a o lo'u oti, o lo'u manuia lea”* (Filipi 1: 21). Ona sa ia iloaina o le a ia fa'atasi ma Keriso pe a maliu o ia, sa ola ai o se tasi sa tala'ia Keriso ma le mafanafana. Pe o iā oe ma a'u lenā mafanafanaga?

Ua tatou iloaina e aumai e le Tusi Pa'ia iā i tatou le moni ma le fa'amoemoega, ae tumau pea i tatou o ni 'a'ano ma le toto e lagonaina le tigā loloto pe a to'esea se tasi tatou te alolofa tele i ai. O nisi e lē uma lenā mafatiaga. O le Tusi Pa'ia ua fa'apitoa ona ua aumaia sina va'aiga o mea e tutupu mulimuli mai i le maliu, pe o se tane, o se avā, o se tamaititi po'o se uō pele, e mafai ona tatou tapā le Tusi Pa'ia mo le fa'amalosia'u ma le fa'amafanafanaga – ona o fea se isi mea tatou te maua mai ai ni tali moni?

PE A MALIU SE TASI E PELE

Ae tatou te fa'avauvau pea – tatou te fa'anoanoa. Tatou te mafatia ma e lagonaina le leai o se fa'amoemoe. E ui e fa'aosoosina i tatou e taofiofi ia i tatou lava ae o se vaega tāua lona lua e mafai ai ona feagai atu ma le maliu o sē e alofagia:

#2. A'apa atu iā i latou e mafai ona fesoasoani ma amana'ia mai.

O tagata i nofoaga 'ese'ese ua i ai a latou aganu'u ma sauniga e fa'aaloaloga ai latou ua maliliu ma fa'amafanafana ai latou aiga ma uō. E masani o aiga ma uō e potopoto e fesoasoani ma lagolagosua ma fa'amalosi'au. O tala e uiga i lē ua maliu e masani ona faia e latou e mafana le mafutaga. Tatou te fa'anoanoa i nei mea pe a tutupu ma e maligi ai fo'i loimata – ae o le isi itu, o le manatuaina o le olaga, o mea na ausia e o'o lava i ni tala malie i le olaga e uiga i lenei tagata o se fa'amafanafanaga tele lea.

O se fa'alogoga lelei pe a tatou 'au ai i se maliu o se tasi ma fa'alogologo i tala'aga o lona olaga. O se fa'agae'etia i le loto pe a fa'alogo atu i le atali'i, le afafine, nisi o aiga o fa'amatala ni uiga tāua o lea tagata. O nei tala e tāua ia i latou aemaise pe a fa'asoa e se isi e iloaina lelei lenei tagata. Ma e tataua ona fa'asoa. E ui o lenei faiga e mafatia, ae o le a maua ai se to'afilemū i le fa'alogo i tala a lenei alo o le Atua ua i'u lana faigamalaga.

O nisi o taimi e natia e tagata o latou fa'anoanoaga, ma i le faia o lea ua latou vavae'ese mai ai latou mai tagata e mafai ona fesoasoani atu iā i latou. O le si'osi'omia e tagata e alolofa iā i tatou e fesoasoani tele lea i le malaga atu i le fa'anoanoaga. A sau le maliu, e mana'omia ona tatou talia taumafaiga a isi e fa'amafanafana mai iā i tatou. Atonu e i ai taimi e leiloa po'o le a se tala e fai mai – ae o lo'o latou taumafai e fesoasoani ma e lelei ona talia lenā fesoasoani. O le fa'ama'i o le Koviti – 19 ua sili ai le tigā o le nofo to'atasi ma le fa'a'esea. Ona o tatou o tagata ola, tatou te mana'omia isi ma e moni tele lenā i taimi o fa'ama'i ma le mafatia.

Afai o 'oe o se tasi e mana'o e avatu se fa'amafanafanaga i se tasi, ia fa'aeteete le a'apa atu i sē o lo'o pagatia. Ia tu'u atu i lenā tagata se taimi ma se avanoa e fa'anoanoa ai. O lo'o fa'amanatu mai iā i tatou e Sirako 3 e i ai taimi e fa'anoanoa ai, e tagi ai ma leai ai o se leo. O lo'o i ai fo'i ma le taimi e oti ai – ae lē pau ai lea. O lo'o i ai fo'i le taimi e fa'amaopo mai ai, e alofa

atu ai, ma fa'aleleia ai. A a'apa atu iā i latou o lo'o fa'anoanoa, ia mautinoa o lo'o e faia ina ia e fesoasoani atu ai iā i latou ia uia o latou fa'anoanoaga, ae le o le faia mo sou lelei.

O lo'o famaumuina e evagelia na tagi Iesu ina ua maliu lana uō. Ua tatou faitau, "Ua silafia e Iesu o ia (Maria) ua tagi, ma lutaia ua o mai ma ia ua fetagisi, ona tigā tele lea o lona finagalo, ma ua ātu lava o ia; ona fa'apea atu lea, "O fea na outou tu'uina ai o ia?" Ua fa'apea mai i latou iā te ia, "Le Ali'i e, maliu mai ia, e te silasila i ai. Ua tagi Iesu" (Ioane 11: 33 – 35).

E i ai lava le manatu na lagona le fa'anoanoa i le leai o se fa'atuatuga ua si'omia ai o ia. Ae e manatu e talitonuina ona o ia o le uō a Lasalo ma sa mafanafana i lona aiga. O nisi o taimi ona o tatou o ni tagata matutua e galo ia i tatou o fanau ma tupulaga talavou e lagona fo'i le pagatia pe a latou va'aia ni mātua po'o nisi o aiga ua maliliu. Atonu e le o mautonu i mea o lo'o tutupu aemaise pe afai e laiti. O nai fautuaga mo nai fanau fa'apea fo'i le au matutua:

Fa'aali Fa'alogoga ma Sa'ili se Fesoasoani.

Afai o 'oe o se tupulaga ma sa a'afia i ni mea fa'apenei, aua le fefe e a'apa atu i isi e alofa mai. Ia loto tele – e mafai ona tauave le mea ua tupu. Ia mata'itū ma a'apa atu i faiaoga, ma isi o le au matutua e te fa'atuatua.

Sa'ili Le Uiga

O taimi o fa'anoanoaga ma papuagatia e fa'aosoafiaina ai i tatou e faia le fesili tele o le olaga: Aiseā ua 'ou i ai i'inei? 'Aua ne'i 'alo 'ese mai nei fesili. O le sa'ilia o ni tali o le a fesoasoani tele lea mo se leleiga.

Ia Va'ai Fa'alelei ia 'Oe Lava

E faigofie ona mamulu atu faiga masani e tumau ai le malosia ma le soifua maloloina lelei. Atonu e lelei se moe ma nisi mea masani. Pe le popole i mea 'ai. Ae o le tausiga o le soifua maloloina fa'aletino e tāua i le malaga ai i taimi fa'apenei o fa'anoanoaga.

#3. Sa'ili ina ia malamalama i le mafuaga o le olaga.

Ua fa'amanatu mai tusitusiga i luga ina ia sa'ili le uiga i le olaga. E moni ina ia malamalama i le oti, e tataua ona tatou malamalama muamua i le uiga o le ola. Aisea ua tatou i ai nei i le lalolagi? O le a le uiga o le ola o le tagata?

O le moni o tatou o fanau a le Atua. Na faia i tatou i lona fa'atusa. I le mataupu muamua o le ulua'i tusi a le Tusi Pa'ia, ua tatou faitau ai "Ona fetalai ane lea o le Atua, inā tatou faia ia o le tagata i lo tatou fa'atusa, ia foliga iā i tatou; ia pule fo'i i latou i i'a o le sami, ma manu felelei, ma manu vaefa, ma le lau'ele'ele uma, atoa ma mea fetolofi i le 'ele'ele. Ona faia lea e le Atua o le tagata i lona fa'atusa, o le fa'atusa o le Atua na ia faia ai o ia; na faia e ia o i la'ua o le tane ma le fafine" (Kenese 1: 26 – 27).

O tatou iloa o le a le uiga o lenā mea? O lona uiga *ua e foliga e pei o le Atua*. E ao ona malamalama – i lona mamalu ua sili atu lona pupula i lo le lā. E le mafai ona tatou va'ai i ai ma ola. Ae afai e mafai ona tatou va'ai i ai ile fa'aleagaga, o le a va'aia se tasi e pei o tatou – ona o tatou e foliga ia te ia. E fa'aapefa ona tatou mautinoa lenei mea? Fuafua le mea lenei; "Na ola Atamu i tausaga e tasi le selau ma le tolugafulu, ona fanaua lea e ia o lona atali'i e foliga ia te ia ma fa'atusa i ai; ma ua fa'aigoaina e ia lona igoa o Setu" (Kenese 5: 3). O le fa'aupuga lava e tasi – faia i lona fa'atusa, o ona foliga – i le Kenese 1 ua fa'amatalaina le Atua na faia le tagata.

Le matagofie – o le a tatou *pei o Ia*, ma o le a tatou va'ai iā te *Ia o Ia lava*. O le uiga lenā o le olaga nei. O le uiga o lenei olaga e lē o le tineia ae o le toe fanau fouina mai e toe ola ai le ola fa'al-etino. O le uiga o la tatou olaga fa'aletino ina ia tapena mo le olaga e fa'avavau. "O i latou uma fo'i o i ai lenei fa'amoemoe ia te i latou, ua ta'itasi ma fa'amamāina o ia e ia, fa'apei ona mamā o ia" (1 Ioane 3: 3).

O le mea lea tatou te lē olaina o tatou olaga e lē tapasāina e leai se fa'amoemoe mo a taeao. Tatou te ola mo Keriso, ina ia pei tatou o Ia – ma afai tatou te faia fa'apena, talia lana faigataulaga mo a tatou agasala, ma tatalo atu ma le loto mauualalo e ta'ita'ia o tatou olaga, o le a tatou ola ai e fa'avavau.

Fofoaina ina ia maua mai "Mea Uma"

Ua tatou faitau "*a ua fa'apea ona molitino mai i le tasi upu, Seā 'ea le tagata ua e manatu mai ai iā te ia; po o le atali'i o le tagata ia ua e asiasi mai ai iā te ia?*" (Eperu 2: 6). E moni e leai se tāua tele o tatou pe a fa'atusatusa atu i le telē o lenei paneta, ae itiiti atu i lo le vateatea. Ae e i ai le mafua'aga na faia ai i tatou e le Atua: "*Ua e fa'amaulalo ane teisi o ia i agelu; ua e fa'apale iā te ia i le mamalu ma le vi'iga; ua e tu'uina fo'i*

o mea uma lava i lalo o ona vae; ua le tu'ua e ia se mea e tasi e le'i tu'uina i lalo iā te ia" (Eperu 2: 7 – 8).

Tatou te lē o mauaina *mea uma* e tu'u i lalo o tatou vae, e pei ona fa'amatalaina e Paulo, ona o le taimi nei ua tatou i ai ua na o le tino. Ae a tatou ulufale atu i le olaga – olaga moni, olaga e fa'avavau – o le a tatou talia mea ua tu'u mavae mai mo tatou.

A tatou puapugatia ona o le vala'au a le oti i se tasi e pele ia i tatou, 'aua le fa'anoanoa. O lo'o i ai le fa'amoemoe. O lo'o i ai se lumana'i. O tatou olaga sa fuafuaina atoa i se fuafuaga na faia e le Atua. O le aiga fa'aletagata o se vavega. O lo tatou i ai i'inei e lē o se mea na fa'afuase'ia. E i ai le mafua'aga ua alai ona tatou i ai i'inei – ma o lenā mafua'aga ua aumai ai iā i tatou se fa'amoemoe. Ua fa'amatala e Paulo, "Matou te loto ina ia outou iloa, le au uso e, e uiga i e o momoe, ina ne'i outou fa'anoanoa, pei o isi e leai so latou fa'amoemoe" (1 Tesalonia 4: 13).

Feagai atu i le Ola ma le Maliu ma le Mafanafana

E faitau miliona latou e ola i le mata'u ona e leai se fa'amoemoe. Ua latou talitonu o filosofia ua a'oa'oina ai i latou o le oti o le i'uga lea e fa'avavau. Ioe o la tatou Atua e le gata e amio tonu ae alofa fo'i. Ioe e mafai ona tatou fa'apea a'e e pei ona fai mai Paulo, "Ia fa'amanuia le Atua o le Tamā o lo tatou Ali'i o Iesu Keriso, o le Tamā e ona le alofa mutimuti vale, o le Atua fo'i e ana le fa'amafanafanaga uma; o lē na te fa'amafanafanaina mai ia te i matou i lo matou puapuga uma lava, ina ia matou mafaia ona fa'amafanafana atu ia te i latou ua maua i se tasi lava puapuga, i le fa'amafanafanaga ua fa'amafanafanaina ai i matou e le Atua" (2 Kirinito 1:3 – 4). O le mafatiaga i le to'esea o se tasi e pele e moni. Ae mafai ona fa'amafanafanaina i tatou, ma le iloaina e i ai le mafua'aga mo puapugatia ma o le oti e lē o le muta'aga lea. A o tatou va'ai atu i le Atua, savali fa'atasi ma ia, ma tu'u atu iā te ia e ta'ita'ia o tatou olaga, o le a tatou malamalama atili i ana mafua'aga ma o le a mafai ai ona tatou fesoasani atu i isi i la latou fo'i faigamalaga.

FEGALEGALESA'I – O FEA O LO'O TATOU AGA'I I AI? O SE VA'AIGA MAI LE PALISI.

O se tomanatunatuga i le fegalegalea'i, le aiga ekalesia ma le tala'iga a le Ekalesia ua fa'atinoaina mai e le olaga a le palisi

E to'atele tagata e le'i masani i le upu 'fa'asinoti (fegalegalea'i) i luma atu o Oketopa 2021. Ona soso'o ai lea ma le fa'alauiloaina e Pope Faranisisi o ana fuafuaga, vala'uina tagata Katoliko mai pule'aga, palisi ma aiga e 'faimalaga fa'atasi' ma avea 'o se Ekalesia Fegalegalea'i'. Mo le to'atele o tagata masani, o le filifilia o le upu i luma o 'falesa' o le 'Katoliko', pe a fa'asino i tagata i Roma. Ae o le 'Ekalesia e Fegalegalea'i - O le a le uiga o lea fa'aupuga?

Mai le Sinoti a Epikopo aga'i atu 'Ua o mai Tagata Uma'.

Fa'asinoti po'o le fegalegalea'i – o se tasi o upu na sau mai le gagana Eleni mo le *potopotoga* po'o o *se fa'apotopotoga* o tagata. O le manatu o le fegalegalea'i ua fa'aogaina mo se faiga o le potopoto mai mo se talanoaga, o tagata ua vala'uina, fa'alogo atu i ai ma tu'uina atu i ai le avanoa e fa'aleo mai ai o latou lagona. Fegalegalea'i ua avea ma fa'aaliga maumaututū o le va'ai mamao a Pope Faranisisi mo le Ekalesia. Ua fa'aleoa maia le mafaufau a se Pope, i ana lava upu, e mana'o i se Ekalesia e palapalā ma totoulia ma alu atu i tuā'oi ma si'osi'omaga (*Evangelii Gaudium* 49).

Fegalegalea'i, Auai ma le Tala'i

O vaega ia e tolu ua aumaia le fa'ava'a o le sinoti. I se isi manatu ua pu'epu'eina ai le uiga o le Ekalesia – 'O, fai nu'u uma ma so'o.' O le Tala'iga – Faifa'atasi ia Mataio 28 ua folafolaina mai seneturi i aganu'u 'ese'ese, ae tutusa lava o latou mataupu fa'avae: fa'alogo i le Agaga, ia ola ai ia Keriso ma vala'u i isi e faia fa'apea. Ua tu'uina atu i le Ekalesia le fa'atuatuga e fa'apelepele ma fa'asoa le Upu Ola, ma avatu i augatupulaga fou, e ala i a'oa'oga ma galuega a ali'i ma tama'ita'i o le fa'atuatua. O le misitelio lenei ua tu'ufa'atasia ai i latou ua papatisoina, le mafutaga feagai ai a le Fa'auluuluga a Keriso ma lona Tino, le Ekalesia.

O se tasi o fesili mo le fa'atalanoaga mai tapenaga a pule'aga pe fa'apefea ona fa'ateleina po'o le fa'agalueaina le patipatia i le Ekalesia. A o tatou auai i fa'atalanoaga, o se manatu mo tomanatuga ua o'o mai. Ua fa'amealofaina le Ekalesia i ni sakalameta se lua: Fa'aipoipoiga ma le Tofiga Pa'ia. E ala i o la kalasia, o fa'apotopotoga palisi ua mafai ona fa'atupu ai le faipa'aga fa'asosaiete e fa'asoa i tua atu o a latou tuā'oi. Ae ui i lea, o tofiga e lē o ni vaega o fa'akatesimo a palisi. O le malamalama'aga i Tofiga Pa'ia i palisi e masani ona fa'aitiitia i se matafaioi o le fa'ataunu'uina o sakalameta ma le tauaveina o fausaga. O fa'aipoipoiga ua va'aia o se feagaiga ua fa'amaufa'ailoga ai se mafutaga fa'aleuō i le va o tagata e to'alua, o se filifiliga fa'aletagata mo le lelei o le ulugali'i, e aunoa ma le a'afia tele ai o le olaga fa'apalisi po'o fa'apotopotoga tuā'oi. Pe o le tele o fa'aogaina ma le tu'uina o le fa'atuatuga i le kapite mo tofiga Kerisiano i le vituti a le papatisoga a se tasi, fa'atasi ai ma sakalameta o le 'au'aunaga o lo'o i ai le 'auga o le patipatia i le tala'iga?

O Mamoe e leai se Leoleo Mamoe

“Ua fa'atamilo Iesu i 'a'ai uma ma fāoa 'a'ai, ua a'oa'o i o latou sunako ma tala'i i le tala lelei o le malō, ua ia fa'amalolō fo'i i ma'i uma, ma ma'i tigā uma o le nu'u. Ua silafia e ia le motu o tagata, ona mutimuti vale ai lea o lona alofa ia te i latou, ona ua lailoa i latou ma tu'ulafoaina, e pei o mamoe e leai so latou leoleo mammoe” (Mataio 9: 35 – 6).

Sa fa'amatalaina e se tasi o faife'au se fonotaga sa 'au atu i ai. Na amata lona fonotaga i se tatalo ma o le faitauga o le 'Ala i Emau' na amata ai le fonono, ae meaane ua fa'ate'ia ina ua manatunatu i le faitauga i luga mai le Evagelia a Mataio. Na fesili le mafaufau pe aiseā i le 'mamoe-e leai-se leoleo mamoe ua tautala mai ia i latou, i lo le fa'atonuina o le Ala i Emau na faitauina e amata ai le fonono. O latou sa 'au atu i le fonono e lē o aga'i 'ese mai Ierusalem i le mata'u, e pei o so'o i Emau. Sa manana'o e 'au ai. Sa i ai so latou manatu e uiga i le fegalegalea'i, 'auai, tala'i. Ae e foliga e lē o mautinoa le uiga i le lumana'i ona o mea na tutupu i taimi ua tuana'i. Sa i ai lava se manatu e to'atele e lē toe fo'i i palisi ma e to'atele o tatou ua fa'anoanoa ona o a tatou fanau matutua ua lē toe 'auai i Misasa. E to'atele ua fa'apea mai e tataua ona faia fa'alelei ae lē o mautinoa po'o leā. Mo nisi o suiga mai le Vatikano II.

FEGALEGALESA'I – O FEA O LO'O TATOU AGA'I I AI? O SE VA'AIGA MAI LE PALISI.

Mo isi e le'i lava suiga. O nisi ua talitonu o le matafaioi lea a le epikopo, ae o isi ua tu'ua'ia le au fa'atonu ua tele le paoa ma le pule. E leai se isi na ta'ua le mana'omia mo le salamō po'o liua, e ui o nisi sa ta'ua le tāua o le a'oa'oina o le tusi pa'ia.

O le Auala Fa'afanua a Iesu ma le mafua'aga o le Ekalesia.

Ae ui i lea, o le faitauga mai ia Mataio 9: 36 ua fa'atalitali mo le vala'au a Iesu mo ni faiga fa'amisionare. O le mataupu 10 o se fa'amatalaga auiliili o le auala fa'afanua a Iesu. Ua ia vala'aui-na le au aposetolo ma avatu i ai ni fa'atonuga manino lelei. Sa ia lapata'ia i latou i se tulaga puapugatia tele ma se leai o se to'a filemū o lo'o fa'atali mai luma, ma pe fa'aapefa ona latou tomanatu i le koluse. Ae na fa'aauau pea le tala'iga, ma na fa'ai'u e Mataio lana evagelia i se folafolaga o le a fa'atasi pea Iesu ma lana Ekalesia 'e o'o lava i le gata'ana o le lalolagi' (Mataio 28: 20). E lē o fa'aalia manino maia lenei i le ola ai o le sakalameta o le 'au'aunaga? O se ali'i ma se tama'ita'i ua va'aia ai le feagaiga e fa'avavau 'e fa'atasi pea ma 'oe' i folafolaga na la faia i le aso o le fa'aipoipoiga, ma le folafolaga o le fa'aauauina o le tutumau ma le onosa'i. O latou ua vala'auina i le fa'au'uina i ositaulaga ua fa'apa'iaina mo le fa'aolataga o latou iā latou tausiga fa'apea lo latou lava fa'atulagaga ia Keriso, e ala i se olaga tatalo ma le fa'atuatua. Le au nofo voto ua fa'apa'iaina o latou olaga i le usita'i i le alofa e lē gata a le Ali'i. Se tasi o ituai-ga ua faia le koluse ma a latou tagavai: O le Koluse e mautū ae o le lalolagi ua gai. E fa'amafanafana lenei ia i latou ua tu'ufa'atasia ia Keriso i le papatisoga ua vala'auina i le fegalegalea'i. O lo'o va'aia ni fa'aailoga o ni suiga mālie i lenei lalolagi fesuisuia'i. O se tala lelei lenei ua fa'amanatuina fa'asauniga, vala'u i isi i le aiga a le Tamā. O le auai i le tala'iga a Iesu ua fa'aautū i le koluse, e pei ona fa'amanatu mai e le tagāvai a se tasi o ituai-ga; 'o se tala'iga 'mo le lelei po'o le leaga' e pei o le tautoga a i la'ua o le a avea ma ulugali'i fou i luma o a la'ua molimau. O ositaulaga fa'au'uina ua fa'apa'iaina e faia ia va'aia le alofa o le Atua, fa'amanuia ma fa'apa'ia le Ekalesia, ma ta'ita'i tagata a le Atua aga'i i le lagi. Ae o ositaulaga e tutupu mai i ni fa'atoaga po'o le palā'au a le epikopo; ua tuputupu a'e i aiga. E galue le Atua i auala misitelio, ma fa'ata-

lanoaga uma i le fa'asinoti, atonu o le auala o lo'o i o tatou luma.

O le aiga ekalesia o se auala lea o le fa'avae

I taimi o le lokaina, sa patipatia lava ni Misasa i falesa i aso uma, ae ona o le tulafono a le Koviti o le au fa'atuatua sa le mafai ona 'auai. O faife'au sa fa'aauau pea ona faia le faigataulaga, fa'apa'ia mealofa mo tagata ua na o le maimoa mai i luga o faiga fa'atafa'ilagi. Ma na fua mai ai ni fua: i se auala fa'amisitelio o nisi o aiga na molimau mai sa mafai ona feso'ota'i ma le fa'atuatua a latou fanau i taimi o le lokaina, i ni auala fou atonu sa misia ia latou palisi.

E fa'aapefa i le fa'agasologa o le sinoti ona malamlamaina i le manatu i a'oa'oga a le Ekalesia e uiga i aiga o se ekalesia fa'aleaiga? E lē o se mea fa'afuase'ia o tusitusiga mulimuli i le sauni atu mo le sinoti, o lo'o aumai ai se tautalaga a Sagato Ioane Chrysostom fa'apea 'o le sinoti ma le Ekalesia e uiga tutusa sa galue i Anitioka ma na avea ma Akiepipoko a Constantinople. Sa ia maua se 'ele'ele lelei mo le fa'aevageliaina i olaga masani i aiga Kerisiano, sa ō fa'atasi ma le pule fa'aekalesia. Fa'aosofiaina e Sagato Paulo, na tautala Chrysostom e uiga i le tāua o tamā, le au fai pa'aga ma a latou avā, fa'aleleina o latou fanau ma le malamalama ma le fa'atinoina o e fa'atuatua a le Ekalesia. O le tu masani fa'aaposetolo ma le perisitua na toe maua mai ma le manino e le Vatikanano II:

O le aiga, e pei ona i ai, o le ekalesia fa'aleaiga. E i ai totonu o matua e tatau iā latou upu ma fa'ata'ita'iga, o ulua'i a'oa'o o le fa'atuatua i a latou fanau; e tatau ona latou fa'alototele iā i latou i ni tofiga e talafeagai mo latou, fa'afaiileleina ma le fa'aetetega se tofiga i se tulaga pa'ia (*Lumen gentium II*).

O a'oa'oga nei a Pope Faranisisi, e pei ona fa'aailoa mai e le Sinoti i Aiga, le apoapoa'iga ile mae'a o le sinoti *Amoris Laetitia* ma ile Fonotaga a le Lalolagi i Aiga, 2018. E lē fa'ate'ia o se tasi o Fonotaga a le Lalolagi na fuafuaina i le taumafanafana o le 2022 o lona sini'. O le Aiga Ekalesia ma le Fa'asinoti'. I potopotoga fa'aleaiga, ua iloa e le fanau le alofa o le Atua e ala i le alofa a o latou matua. Ua latou iloina muamua e uiga i vituti o le agalelei, faitaulaga, ma le mamalu.

FEGALEGALES'A'I – O FEA O LO'O TATOU AGA'I I AI? O SE VA'AIGA MAI LE PALISI.

O le ala fa'avae i aiga ekalesia e lē o se pisinisi e fai to'atasi. I se aganu'u mulimuli mai i le Fa'akerisiano e lē lava le avatu i matua o se tusi kapite, ma tu'u atu i latou e sa'ili pe fa'apefea ona ola ai ni olaga pa'ia e latou lava. O se fa'amausalīina lenei o le matafaioi faifa'atasi, o le fa'afegai atu lea i le pule fa'afaife'au. E pei ona ta'ua e nisi i talanoaga a palisi o le pule to'atasi a faife'au ua taofiaofia ai le olaga lelei a se palisi. O le matafaioi faifa'atasi i le tala'iga ua maitauina le i ai o le Agaga i le fa'afetai mo kalasia ua talia i sakalameta a le Ekalesia. O le tala'iga o le maitauina lea o lo tatou mativa ma le alu atu i le Ali'i e leai se mea i o tatou lima, e le afaina pe o se tagatā lotu po'o se ua fa'au'uina. Ona avanoa ai lea o tatou lima e a'apa atu ai i le isi tagata agasala ua salamō. O le fesili mulimuli a le pule'aga e fa'apea: Pe o lelei le Ekalesia i le fa'atinoina o le fegalegalea'i?

Fa'ai'uga

Auā e fa'aolaina i latou uma o e vala'au i le suafa o le Ali'i. O lenei pe fa'apefea ona latou vala'au atu i lē ua latou lē fa'atuatua i ai? Pe fa'apefea fo'i ona latou fa'atuatua i lē ua latou lē fa'alogo atu i ai? Pe fa'apefea fo'i ona latou fa'alogo atu, pe a leai se tala'i atu? Pe fa'apefea fo'i ona tala'i atu pe afai ua lē auina atu i latou? (Roma 10: 13 – 15).

O lo'o maua'a i tatalo ma talanoaga i le va o tagatā lotu ma faife'au fa'au'uina, o palisi e mafai ona avefa ma punāvai o le fa'aosofiaina ma le

lagolagosua i matua e avefa ma ta'ita'i moni i le fa'atinoina ole fa'atuatua i o latou aiga i le atina'e o ni galuega faifa'atasi e lagolagosua i ia galuega. Ona mafai lea e nei aiga o le fa'atuatua ona fa'aolaola le olaga a le palisi. O le matafaioi e tau'ave fa'atasi i le tala'iga ma le kalasia a le Fa'aipoipoiga ma Tofiga Pa'ia ua maua mai ai se gaioiga fa'alesoifua maloloina lelei mo palisi, male 'au'aunaga mo le fa'apotopotoga laua'itele. O le fa'avaeina o le fa'atuatua o se alaga tatau lea mo le Ekalesia ina ia avefa ma fa'ailoga va'aia i palisi fa'amisionare, ma 'au'auna atu i tuā'oi ma tagata 'ese. Atonu o le palisi i le uma o le Koviti o le a fa'aitiitia i numera, ae o le 'a malamalama atili i lana tofiga fa'atala'iga. Tatou te tatalo pea o le fa'apa'iaina e le Atua le Ekalesia i se sasa'a fou mai o le Agaga Pa'ia, o le fa'agaioiga ua tatou faia nei o le a fa'avaeina ai i tatou i le tulaga fa'atamā ma le fa'atinā na finagaloina e le Atua, ma o le kalasia o a tatou papatisoga o le a fafaguina maia le maoa'e. Pe o lelei le Ekalesia i le avefa ma sinoti? Atonu o le fesili e tatau ona fa'apea, pe o lelei le Ekalesia i le fa'amaoni? E telē lava le galuega e tatau ona fai.

“E tele le saito e seleseleina, a o le au faigaluega e toaitiitia ia – 'ia outou ōle atu, ona foa'iina mai ai lea (Mataio 9: 37; 7: 7).

14

TOE FA'AFOUGA MAMANA

OLA AI E PEI O IESU

I le Tusi a Paulo ia Kolose, ua ia tusia o Iesu “o le fa'atusa o le Atua e lē va'aia” (Kolose 1: 15). I le gagana o le upu ua fa'aogaina mo le “fa'atusa” o le *eikon*, po'o le “icon”.

Na malamalamaina e tagata Iutaia o le pa'iaga o le Atua, o lona isi poupu e lē gata ma sa fa'asaina nisi ona faia ni fa'atusa o le Atua. O le liu tino o Iesu, e ui i lea, ua fa'aalia ai i le tagata foliga o le Atua, ua va'aia se mea e le'i va'aia. O le mea ua tatou va'aia pe a tatou va'ai atu iā Iesu

e mata'utia! Aiseā? O le Tasi o le fa'atusa o le Atua e lē va'aia ua alu atu ma sa'ili ma fa'auō atu i lē ua leiloa ma lē au fa'aunu'ua.

Na fai se tala ase tasi ana fe'avea'i e Iesu se pepa fa'apisinisi, e masalomia o le a tusia ai fa'apea: Iesu o Nasareta – Fa'auō a le Ao Lafoga ma Tagata Agasala. Na fa'atinoa atoatoa e Iesu le tala'iga na vala'auina ai le Ekalesia e ola ai. Ae e lē gata i lea, o ia o le pa'iaga atoatoa fo'i. E leai ma se isi ua sili atu lona pa'ia pe sili atu lona uiga

TOE FA'AFΟΥGA MAMANA

OLA AI E PEI O IESU

fa'atala'i i lo Iesu. O lona olaga o se fa'ata'ita'iga pe fa'a'apefa ona tatou ola ai o se Eklesia.

Manatua le talanaoaga i tulaga e tolu e mafai e le Eklesia ona feagai atu ai i le lalolagi? Atonu ua tau fa'ateleina lenei mau, ae o le tala'iga e aunoa ma le pa'iaga e aga'i atu i le fa'aofi mai. E fa'apea fo'i le pa'iaga e aunoa ma le tala'iga e aga'i atu i le tu'ufua. Mulimuli lava, pa'iaga ua palenei ma le tala'iga ua fa'afaileleina le feagai atu i le tala'iga, o se tu lelei lea a le Eklesia.

Feagai Atu i le Tala'iga

A tatou va'ava'ai i le olaga a Iesu, ua tatou va'aia na sau e sa'ili ma lavea'i latou ua leiloa. E le'i na o na fealaua'i solo, tatala se ofisa, faia ni tofiga ma fa'atalitali mo tagata e o mai iā te ia. Sa alu atu. O le tala'iga a Iesu sa mulimuli pea i se faiga o le feiloa'iga – feiloa'i atu i isi i taimi o latou tigā, puapugatia ma le leai o se fa'amoe-moe. O Iesu o le misionare: o le misionare ua sili le lelei. Na auina mai e le Tamā ma i le uma o lona toetu, na ia auina atu ona so'o. Ae lei tu'ui-na atu latou i le lalolagi, e ui i lea, sa ia poloa'i atu ia i latou “ou te auina mai iā te outou lē na folafolaina e lo'u Tamā” (Luka 24: 49).

Ua auina atu e Iesu le Eklesia i le tala'iga ma avatu i le Eklesia le mana e ausia ai le tala'iga e ala i le mealofa a le Agaga Pa'ia, na tu'uina mai i le Penetekoso. Na amataina moni le Eklesia i lenā aso matagofie ina ua sau le Agaga Pa'ia i luga o le au so'o a Iesu fa'atasi ai ma laulaufaiva afi. Afai tatou te manana'o e ola ai le moni o le fa'atinoina o le fa'amisionare ma ia fua mai – o ni tagata ta'itoa'tasi, palisi ma pule'aga – e tatau ia i tatou ona vala'aulia ma galulue fa'atasi ma le i ai, le tagata, ma le mana a le Agaga Pa'ia.

E mana'omia ona tatou fa'amasani i se Penetekoso fou i o tatou olaga. I le Evagelia a Ioane ua tatou faitau ai na manavaina e Iesu i luga o ona so'o, fa'ae'eina iā i latou le Agaga Pa'ia. Sa fai atu ia i latou (ma se fa'aauuina, ia i tatou), “Fa'apei ona auina mai o a'u e le Tamā, fa'apea fo'i ona ou auina atu outou” (Ioane 20: 21).

E pei o upu matagofie a Pope St. Paulo VI i lana *Evangelii Nuntiandi*: O le Agaga Pa'ia lava ia, i aso nei e pei o le amataga o le Eklesia, na gaioi i fai evagelia uma ma tu'uina atu o ia ina ia ulu-fia ma ta'ita'iina e ia.”

Ina ua papatisoina i tatou, na tatou talia le Agaga Pa'ia, o lē “na manava mai i o tatou luga” se ola fou ia Iesu Keriso. Ina ua fa'atuina e Iesu lana fale'ie e fa'atasi ma i tatou, o tatou o se Eklesia e tatau ona fa'atū la tatou fale'ie fa'atasi ma i latou ua vala'auina i tatou e pa'i atu i ai. O le mana o le Agaga Pa'ia ua mafai ona tatou faia lenei, ave ma alofa liutino tagata a le Tamā mo isi a o tatou tofitofi o tatou olaga ma savali fa'atasi ma tagata po'o fea lava o i ai i latou.

A o tatou faia lenei, e tatau ona tatou folafolaina le moni atoatoa: le evagelia atoa ma le 'oa o le olaga ia Keriso e sau iā i tatou e ala mai le evagelia ma a latou a'oa'oga. O le fesili moni la, e fa'apefa ona tatou folafolaina atu le moni atoatoa i se lalolagi ua le toe malamalamaina i la tatou va'ai i le lalolagi, ua le toe manatu i vaega fa'atelosia ma le fa'afilosofia a le Eklesia? E fa'apefa ona tatou fa'aliliuina ina ia lagona e le lalolagi o ia ma ia maua le poto masani o le sa'olotoga e talia ai pe te'ena le evagelia?

E masalomia le to'atele o tagata sa te'ea le Fa'akerisiano e lē malamalama i ai ona ua le mafai ona tatou avatu i ai le fe'au a le evagelia ma Tu Masani Kerisiano i se auala e mafai ai e latou ona taliaina. Tatou te le'i fa'aliliuina fa'aleleia mo latou o lo'o tatou taumafai e pa'i atu i ai.

E i ai se alagaupu fa'a-Italia e fa'auigaina fa'apea – “o le fa'aliliuina o le fa'alataina.” I se isi fa'aupuga, so'o se taimi lava tatou te fa'aliliuina ai se fa'aupuga, ua tatou faia i se tulaga lamatia o le lē maua atoa o le uiga i le fa'aliliuina. Ae ui i lea, e mafai ona fa'aliliuina fa'aleleia ma lē ave'eseina ai lona uiga moni. Pe fa'apefa ona fa'aliliuina le moni e aunoa ma le lē suia o le moni i se gagana 'ese o se tasi o fesili tāua i le Eklesia i aso nei.

O taumafaiga e fa'aliliuina ua fa'afaigatā i le i ai o vaega e mau 'ese'ese i totonu o le Eklesia. E pei ona tatou va'ai i ai, o le fa'aofimai, i le va'aiga fa'afoliga o se fa'aliliuga, ua mana'o e fa'aleagaina ma ave'ese atu ni vaega o tu masani o se fa'alataina ma o se auala o le fa'anefu ma le fenunia'i. O latou ua fa'a'esea ua fa'apalepale na o le gagana mai “totonu”. Mantua, upu a Pope Faranisisi ma lana “miti o le ... o se fa'aosofiaga fa'atala'iga (misiona) e mafai ona suia mea uma...mo le fa'aevageliaina o le lalolagi i aso nei.”

O le fa'anaunauga fa'amisionare o le a suia ai

fa'aupuga, o tatou gagana, ma pe fa'apefea ona tatou tala'i atu le evagelia. E mafai ona faia lava a o tumau pea i faiga e lē suia o a tatou Tu Masani e pei ona i ai upu a le tatalo o le fa'atuatua ma a'oa'oga *Kapite a le Ekalesia Katoliko*. Ae ui i lea, a tatou fa'anaunau e ola ai o ni misionare tala'i ma feagai atu i tagata ua tatou feiloa'i atu i ai po'o fea lava, o le a tatau ona tatou taumauga i ai ma onosa'i i nei fa'aliliuga, e ui ona talitonuina e le au fa'a'esea, ma e lē moni, o lenei o le fa'aofi maia o mea leaga i le fa'atuatuaga. E toe ta'ua Pope Paulo VI i lana tomanatuga fa'avae i le fa'aevageliaina i le lalolagi i aso nei, na tusia ile 1975, sefulu tausaga i le mae'a o le Fonotaga Vatikano Lua. I lenei tusitusiga sa ia maitauina ai le tatau mo le tulaga lamatia o ni fa'aliliuga fa'apenei"

O le Fa'aevageliaina, o le a mou atu le tele o lona malosi ma le aogā pe a le manatu moni o lo'oga'i i ai le talanoaga, pe afai e lē fa'aogaina le latou gagana, latou tāga ma fa'ailogā, pe a le taliaina ai fesili ua latou fesiliina, ma fesiligia pe leai se a'afiaga i o latou olaga maumaututū.

O le va'aiga fa'alalolagi a lē ua ola tu'ufua sa ma i tatou mai ulua'i taimi o le fa'a-Kerisiano. Mafaufau mo sina sekone i le liutino lava ia. O le Upu na avea ma tino. E le gata o se ituaiga o fa'aliliuga, ae o le fa'aliliuga silisili. O ulua'i a'oa'oga sesē e uiga ia Keriso e lē o le fa'afitia lea o le mamana o Keriso; o mea nei na mulimuli mai. O le ulua'i fa'afitia e uiga i *le itu fa'aletagata* o Keriso. O latou ua naunau i le amiotonu ua manatu i le mau o le Atua o le a liutino e inoino i ai, e fa'atigā loto ma e taufa'aleaga. Ua tusia e Ioane ile mataupu fa o lana tusi muamua o agaga uma o ē e lē ta'utino, ua maliu mai Iesu Keriso i le tino, e lē mai e ua i latou (va'ai 1 Ioane 4: 2 – 4).

Aisea na avea ai e le Atua le natura tagata? Aiseā i lē ua lelei atoatoa ma pa'ia ona fiilifili e avea ma se tasi o tatou ma ola ai ma i tatou le au malepelepe ma le lē mamā? O le mea moni lava o le liu tino o se fa'aliliuga e taufa'aleaga.

Ae o Iesu o le fa'ata'ita'iga fa'amaui fa'atala'iga. Mafaufau i le pese maoa'e o le sasa'a atu na fa'aoga e Paulo i le mataupu lona lua o lana Tusi ia Filipi (va'ai 2: 5 – 11). O se tasi nei o ulua'i tusitusiga a le Feagaiga Fou, ma na muamua atu i le tusi a Paulo. O le au atamamai na ta'u maia ia i tatou o lenei pese na fa'aogaina tele i le

Ekalesia i le amataga. Na fa'aogaina e Sagato Paulo e ole atu ai i le au Filipi (ma tatou) ina ia tutusa o tatou mafaufau ia Keriso.

O le a le mea ua fa'aalia e le mafaufau a Keriso? Ua fa'aalia ai le tu'ufa'atasia o le feso'ota'iga i le va o le pa'iaga ma le tala'iga. O Iesu na atoatoa lona pa'ia ma atoatoa le misionare e aunoa ma le fetu'utu'una'i. Ua amata Filipi 2: 6 i le ta'u maia ia i tatou "o lē sa uiga fa'atasi ma le Atua," a o lenei e le'i taofia mai ai o ia i le sasa'a mai o ia lava.

O Iesu o la tatou fa'ata'ita'iga mo le olaina ai o le tala'iga a le Ekalesia. Ua tatou va'aia i lenei pese matagofie se fa'aioaina e pei o Iesu, o le Ekalesia ua mafai ona sasa'a mai o ia lava ma tauavea le tulaga o se pologa e aunoa ma fetu'una'iga o le amio sa'o po'o le moni o le fa'atuatuaga.

O le mea lea o tulaga ia e lua o latou ua fa'aofimai ma latou ua tu'ufua o ni sasi ia e tatau ona tatou fa'aofi mai ma le fa'aeteete ina ia iloaitino ma le mautinoa ina ia aua ne'i a'afia ai le olaga ma tu masani a palisi ma pule'aga. O nisi o taimi o nei fa'aletonu ua matuiā e le mana'omia se su'esu'ega e mauaina mai ai. Mo se fa'ata'ita'iga sa i ai se ositaulaga e mafaufau i le uiga o le tu'ufua. Na fesiligia pe aiseā e manatu ai fa'apea? Fai mai o ia o lona tofiga fa'aositaulaga o le fa'amuumua lava o le puipuia lea o le Eukalisitia mai tagata. Ina ua fesiligia pe aiseā, ae fai mai ona o nisi o taimi ua i ai tagata ua talia le Eukalisitia sa le tatau ona taliaina.

Atonu o nei tagata e lei tapena fa'alelei i le fa'aleagaga po'o o lo'o i se tulaga o le kalasia; atonu e lē o ni Katoliko fo'i. E masani ona tupu lenei aemaise lava i fa'aipoipoiga ma maliu. O se tulaga e lu'itau tele. Tatou te manana'o i tagata ia lagonaina o la e fa'aulufale mai, ae tatou te manana'o e tausia a'oa'oga a le Ekalesia e uiga i le Eukalisitia. E lē lelei ona tatou fa'amatalaina lelei lenei a'oa'oga, ae ui i lea, i lo le taumafai e fesoasani atu i tagata e malamalama le natura o le sakalameta, o le autu'ufua ua taumafai e puipuia le Atua mai tagata. Afai o le tulaga na a le Atua, se manū tatou te lē mauaina le liu tino tagata po'o le Fa'akerisiano, fa'apea le Eukalisitia. O le tulaga a le Atua o le fa'amaui fa'amisionare. E tumu ile lamatia. Ua tatala atu o ia lava i faiga fa'asuina ma fa'aletonu, ae i le va'aiga i le liu tino e tatau ona fa'apenā.

TOE FA'AFΟΥGA MAMANA

OLA AI E PEI O IESU

Fa'amau fa'amisionare ua lu'iina ai o tatou uiga. E lē mafai ona tatou pa'i atu i tagata tatou te lē alolofa atu i ai. O le a avea tatou ma ni ala e ui atu ai le alofa o le Atua i le lalolagi pe afai tatou te feītai i le lalolagi.

E 'ese ai lava le faiga na fai ai e Iesu. Ua tatou va'ai i ai mai le Evagelia a Mataio. A va'ai atu Iesu i le motu o tagata pe feiloa'i atu fo'i i nisi, sa fa'atumulia o ia i le alofa. Sa le fiafia o ia. Sa alofa atu i ai. Afai tatou te lē fa'asoa i lenā agaalofoa, e sili ai ona tatous olomuli i tua i nofoaga ua tatou mafana lelei ai.

Faiga masani po'o le Tala'iga?

Ina ia mautinoa o lo'o tatou ola ai i le agaga o le

fa'amau fa'aletino tala'i, e tatau ona tatou tauivi ma se fesili fa'avae: pe ua tatou pipi'i tele ia tatou faiga fa'aalia i lo tatou tala'iga? O se fesili tāua tele lenei e tatau ona fesiligia ai tulaga uma o le olaga a le Ekalesia – palisi, pule'aga, ma ekalesia aoao. O fea e sili atu le tāua iā i tatou? O a tatou faiga fa'aalia– o a tatou tu ma āga, fa'atulagana, amioga, metotia, ma fa'asologa – po'o o tatou tala'iga, le fa'aolataga o le lalolagi? A tatou manana'o e fua mai ni fua, e tatau ona avea i tatou o se Ekalesia e loto malie e suia ana faiga ina ia nofo i le fua tele mai ma i latou na auina atu i ai tatou.

FAITAUGA MO LE MASINA O IUNI– 2022 – TUSAGA C

Faitauga mo le Masina o Iuni – 2022

17

Aso 5 Iuni Aso Sa o le Penetekoso: Galuega 2: 1 – 11. Matua: Ua fa'atumuina i latou i le Agaga Pa'ia, ua afua ai ona Tautala i gagana 'ese'ese.

Salamo: 104: 1, 24 (tali), 29 – 30 (tali), 31, 34 (tali). Tali: E te auina atu lou Agaga, e te fuata'iina fo'i le fogā'ele'ele.

Faitauga lona lua: 1 Korinito 12: 3 – 7, 12 – 13. Matua: O le Agaga e to'atasi na papatisoina ai i tatou uma i le tino e tasi.

Aleluia, Aleluia...Agaga Pa'ia e, afio maia. Ia e fa'atumuina loto o au 'au'auna, ma tutu i ai le afi o lou alofa...Aleluia.

Evagelia: Ioane 20: 19 – 23. Matua: Fa'apei ona auina mai o a'u e le Tamā, e fa'apea fo'i ona 'a'auina atu outou; ia outou talia le Agaga Pa'ia

Tofitofiga o le Upu:

E aogā fo'i le maitauina i le filifiliga muamua mo le Misasa o le afiafi a le Penetekoso ua ofoina mai ai i le fa'afouga o le tusi mo Misasa ua aumai ai ose soa i le sauniga tele o le afiafi a le Eseta: o ni fautauga mai le Feagaiga Tuai, ta'itasi ua i ai ma le salāmo ma le tatalo fa'aperesetene. O faitauga uma sa filifilia mo le sauniga o le afiafi e tasi ua fa'aoga mo le faitauga muamua. O faitauga uma e fa'ua ofoina maia ni va'aiga tetele i le sulufaga o le asō, afai e fa'aoga uma filifiliga nei e fa, o se sauniga ua tele le 'oa i le upu ua tu'uina atu i tagata o le Atua. O faitauga uma e fa – le 'olo i Papelonía ma le fenumia'i o gagana, o ponaivi mamago a Esekielu ua toe fa'aola mai i le mánava a le Agaga a le Atua, le ulua'i faititili i luga o Sinai ua fa'aalia mai ai le afio ai o le Atua, ma le perofetaga a Ioelu o le sasa'a mai o le - agaga – ua fa'aleo uma mai le faitauga mai le Galuega o se faitauga ua tatau mo le Misasa o le asō mo ta'amilosaga uma e tolu. O lenā faitauga la ua ofoina maia le 'auga atoa o le sulufaga o le

asō.

O le mea na tupu i le ‘tautatala i gagana uiga ‘ese’ sa lipotia mai i nofoaga ‘ese’ese i le Feagaiga Fou (Galuega 10: 46; Korinito 14) ma ua fa’amatala vave atu ma vi’iga fiafia o le Atua sa lē malamalamaina. Ua faia i aso nei o se masani e Fa’apopotoga Kerisiano Penetekoso ma le Patipati. O le mea o lo’o fai mai ai Luka i le faitauga mai le Tusi o Galuega e lē o maua ai na faiga po’o na mafua’aga. O tusitusiga a Luka ua faia ma le fa’aeteete ma le fa’atelosia. O fa’amatalaga mai nei faitauga – le lisi umi o tupu’aga o latou na fa’alogo mai Ierusalemā – le fa’amamafaina o le lalolagi atoa o lo’o ‘au ai ma talia le fe’au. I seneturi mulimuli mai ai, sa tauivi le au faitau ma nei lisi o tagata uiga ‘ese ma lo latou tupu’aga ma nofoaga e o mai ai, e pei lava ona i ai i aso nei. O se mea na faia ma le mautinoa ina ia tatou ofo ai i le ‘ese’ese ma le felanulanua’i. O le mea ua aumaia fa’atasi ai tagata i nofoaga sa i ai le au aposetolo o le leo o le matagi malosi o le fa’aaliga lea a le Agaga Pa’ia. Ua latou potopoto ma latou fa’alogo ma ta’ito’atasi ma malamalama ‘le matagofie o le Atua’ e ui i le ‘ese’ese o gagana – o le fe’au lava e tasi na latou talia. O le una’ia atoa a le tusi o Galuega o le upu a le Atua ua fa’amamanaina e le Agaga Pa’ia ua aumai mai Ierusalemā (le nofoaga na amata ma fa’ai’u ai le evagelia a Luka) i tuluiga o le lalolagi. E tasi lava le evagelia ma na fuafuaina mo tagata uma lava – ina ia feagai atu i ai i le upu ua folafolaina.

ASO SĀ O LE TASITOLU PA’IA

Aso 12 Iuni – Faitauga muamua: Fa’ata’oto 8: 22 – 31. Matua: Mai le amataga le poto, a o leai se lalolagi.

Salamo: 8: 3 – 4 (tali), 5 – 6 (tali), 7 – 8 (tali). Tali: Le Ali’i e, lo matou Ali’i, e silisili lava lou suafa i le lalolagi uma lava.

Faitauga lona lua: Roma 5: 1 – 5. Matua: ua fa’amaligi mai le alofa o le Atua i o tatou loto e le Agaga Pa’ia.

Aleluia, Aleluia... O le vi’iga i le Tamā, ma le Alo, ma le Agaga Pa’ia. O le Atua lava o lo’o soifua, na soifua fo’i, o le a afio mai... Aleluia.

Evagelia: Ioane 16: 12 – 15. Matua: O mea uma lava ile Tamā, o iā te a’u fo’i ia; e maua e le Agaga Pa’ia mai iā te a’u, ma fa’ailoa atu ai iā te outou.

Tofitofiga ole Upu:

O le patipatia o le sulufaga ale Tasitolu Pa’ia ua si’itia ai le fa’amoemoe o le fa’atusa fa’atelosia ua femēmēa’i, ma taumafai e su’esu’e pe fa’apefea i le tasitolu ma le tasi ona fetau lelei – o se galuega ua sili atu lona maualuga i so’o se isi o tatou. O le sauniga o le Upu mo le sulufaga i lenei ta’amilosaga ua ofoina mai ia i tatou se mea e ‘ese. O le manatu i le Tasitolu e mafai ona va’aia o se fa’amatalaga po’o se manatu ma uiga ‘ese, o faitauga ia ua tatou faia i le asō. O le faitauga matagofie muamua ua tu’uina maia le Atamai a le Atua ua fa’atagataina ma le maoa’e i le fa’agasologa o le foafoaga, ma le tolaulauina ole upu ‘fiafia’ ma le ‘gaioi’ ua aumaia i se manatu lelei o le fiafiaga i le vaega a le Atua i le fa’agasologa ole foafoaga – ma i le fa’aauuina o le lagolagoina ole foafoaga.

O le Evagelia o se evagelia maoa’e o le fa’amoemoe, o le manatu o latou sa fa’alogo ia Iesu e lē mal-

amalama i mea uma ua ia fai mai ia i latou e moni mo latou fa’alogo i le Ali’i o tautala i le asō. E pei o le manatu o le Atua o se tasitolu ma tu’ufa’atasia, ua tatou maitauina lenei ‘ua telē mo oe i le taimi nei,’ o le mafai o tatou tagata e lē mafaitaulia ona tapu’e mea uma ua fa’anaunau le Atua e fa’asoa ma i tatou, ae e lē o se tatou matafaioi le talatalaina ole misitelio a le Atua, ona ua fa’amautinoa mai ia i tatou o le Agaga o le ‘a ta’ita’ia tatou i le moni atoatoa’. Ua folafola mai e Iesu ia i latou sa mulimuli atu ia te ia (tatou) o le a ta’ita’ia i tatou e le Agaga, ma o le a feagai le Atua ma i tatou ina ia mafai ona tatou taunu’u i lena malamalama’aga ma le taunu’uga mulimuli. Ma o lena manatu o le fa’amoemoe o lo’o ta’ua mai e le Evagelia a Ioane ua fa’aleoina malosi mai e le faitauga mai ia Paulo.

E ala i puapuaga ma le onosa’i ma le fa’apalepale o la tatou fa’amoemoe e moni ona o le Atua na faia fa’apea: ona ole alofa o le Atua ua sasa’a i o tatou loto e le Agaga Pa’ia na aumai ia i tatou. O le Agaga ua uma ona aumai – o lo’o auai le Atua i o tatou olaga – ma o la tatou fa’amoemoe e moni lava lea.

O faitauga o le asō ua vala’auina i tatou e aua le tauivi ma manatu telosia faigatā ae ia tomanatu i le moni o le Atua o lo’o fa’atasi pea ma i tatou ma olioli e fa’atasi ma atali’i o tagata.

ASO SA O LE TINO MA LE TOTO PA’IA O KERISO

Aso 19 Iuni – Faitauga muamua: Kenese 14: 18 – 20. Matua: O Mekisateko ua avane areto ma uaina.

Salamo: 110: 1 (tali), 2 (tali), 3 (tali), 4 (tali). Tali: O oe lava o le ositaulaga e fa’avavau e uiga fa’atasi ma Mekisateko.

Faitauga lona lua: 1 Korinito 11: 23 – 26. Matua: O aso uma tou te ‘a’ai ai i lenei areto, ma feinu i lenei ipu, tou te fa’ailoa ai le maliu o le Ali’i.

Aleuia, Aleluia...O a’u o le areto ola na alu ifo mai le lagi; pe a ‘ai se tasi i lenei areto, ona ola ai lea o ia e fa’avavau...Aleluia.

Evagelia: Luka 9: 11 – 17. Matua: Ua latou a’ai, ua ma’o’ona uma lava.

Tofitofiga o le Upu:

O le sulufaga o le Tino ma le Toto o Keriso o se avanoa e su’esu’e ai le tāua o le tumasani Katoliko e uiga i le Eukalisitia ma vaega ‘ese’ese o le telosia ua fa’amatalaina ma o faitauga o le asō ua filifilia e faia lea. O le faitauga muamua pu’upu’u mai le Kenese ua aumaia i se āta lafoia o Metikaseko ma le manatu o le tofi ositaulaga, ae lē o le tofi ositaulaga a le malumalu, ae o se tofi ositaulaga sa i ai muamua. O lenei mea o le a tu’u atu ai i lē na tusia le tusi i Eperu le lauaitale e fa’amatala ai le tofi ositaulaga a Keriso ma lona tonugalemū i le fa’atuatuaga Kerisiano ua fa’amatalaina i lona maualuga tele lava i le patipatia o le Eukalisitia. O le faitauga mai ia Paulo ua aumaia manino fa’atasi le Tausamiga Mulimuli ma le Pasio a lo tatou Ali’i, ua fa’ailoaina mai ai nei vaega e lua i le patipatia o le Eukalisitia. O le Evagelia o le fa’ateleina o falaoa ma i’a na fa’aoga ma le mautinoa le gagana o le patipatia o le Eukalisitia i gaioiga a Iesu: sa ia tago i le ...fa’apa’ia...tofitofi...ma avatu. O le fa’ama-mafa i le anoanoa’i o mea’ai na maua mo le ‘lima afe tagata na fa’asino i le gaioiga fa’amaumau’oa – ona latou ‘a’ai ai lea, ua ma’o’ona – e lē o se me’ai e itiiti ae o se faiga’ai o le fiafia. O le tulaga sa tele mea’ai na totoe ua toe fa’amalosia ai lenā, ae fa’apea ai fo’i, atonu ua fa’ailoa mai ai le anoanoa’i ua aumai e Iesu mo isi (tatou). O le Eukalisitia o le fa’ailoaina – ma le i ai – o le foa’i fua mai atoa o Keriso le Ositaulaga Sili na fa’ataunu’uina le feagaiga ma fafaga ona tagata ua potopoto – e pei o le asō – e talia le anoanoa’i ua ia ofoina mai ia i latou ua fia galala mo ia.



FAITAUGA MO LE MASINA O IUNI—2022

Aso 26 Iuni Aso Sa 13 Tausaga Masani:

Faitauga muamua: 1 Tupu 19: 16, 19 – 21. Matua: Ua tula'i Elisara ma alu e mulimuli atu iā te ia.

Salamo: 16: 1 – 2, 5 (tali), 7 – 8 (tali), 9 – 10 (tali). 11 (tali). Tali: Le Ali'i e, o lo'u tofi lava 'oe, ma la'u upu.

Faitauga lona lua: Kalatia 5: 1, 13 – 18. Matua: Uso e, ua vala'auina outou i le sa'olotoga.

Aleluia, Aleluia... O au afioga o le agaga ia, o le ola fo'i ia; o iā te oe upu o le ola e fa'avavau... Aleluia.

Evagelia: Luka 9: 51 – 62. Matua: Ua matuā fa'asaga atu Iesu e maliu atu i Ierusalem. 'Ou te mulimuli atu iā te oe i mea uma e te maliu atu i ai.

Tofitofiga ole Upu:

Ia tatou aganu'u ma sosaiete i sisifo, o le talitonuga fa'alelotu a se tasi o se vaega o le si'osi'omaga o tatou olaga, ma o lo'o i ai se puipuiga fa'aletulafono e ola ai se tasi e pei o lana fa'atuatua. Mo lenā manatu e ao ona tatou fa'afetaia ona e lē masani ai i isi atunu'u. Ae ui i lea, o le popolega i le tatou sosaiete o le fa'atuatua a se tasi e faigofie ona tu'u fa'atasi i totonu i faiga a se tasi mai taimi ua tuana'i, ni fiafiaga po'o ni gaioga i taimi paganoa. O tatou faitauga o le asō o se avanoa e fa'amanatu mai ai iā i tatou e lē o ni faiga nei ase tasi e mulimuli i le Ali'i o se so'o. O le fa'aupuga 'ua tauave le ofu tele a le isi' ua sau fa'apitoa mai le va'aiga mai le faitauga muamua. O Elia o se perofeta sili e le'i fefe e folafola atu le upu a le Atua agai atu i faiga fa'apaupau ua sosolo atu i Isaraelu, ma na puapua-gatia o ia i fa'asauaga ona o ia mea. Olea ua ia avatua lenei galuega ia Elisara i le lafoa'i o lona ofu ia te ia. Na talia e Elisara le fa'apa'iaina, ma i le fasia ai o ana povi i le faigataulaga ma susunu lana masini eli palapala sa ia faia se filifiliga e lē mafai ona toe fa'afo'isia. Na fesiligia e Iesu le mea lava lea e tasi ia i latou na o mai ia te ia i le Evagelia o le asō, ua tu'uina mai ni feagai atu laiti a Iesu ma latou o le a avea ma latou e mulimuli atu ia te ia, ma o le vaega masani ia i latou uma o le mana'oga lēfa'afiufiu na faia e le Ali'i ia i latou. O le avea ma so'o e lē o se ta'alogaga po'o sē e manatu māmā i ai. O se lu'itau moni lea mo tatou uma ua potopoto e fa'alogaga i nei upu i le asō. O talitonuga Kerisiano e lē tasi se vaega po'o itū po'o se vaega o le olaga mo se tasi ua talia Iesu o le Ali'i, ae o se mea ua fa'avae ai le olaga atoa a se tasi ma tu'uina atu le va'aiga i le lalolagi e ala i mea uma ua fa'aliliuina. O le lu'itau mata'utia o nei faitauga e ui o se lu'itau moni, e tatou te mauaina fo'i le fa'amalosi'au mai tusitusiga a Paulo i kalatia: i le i'uga lava, o le Agaga e ta'ita'ia ma fa'atasi atu ma i latou e sa'ili e avea ma so'o.